

李文忠公奏稿

李文忠公奏稿

卷之二十八 目錄

機器局動用經費摺

光緒二年八月二十一日  
附清單

防庫練軍改練馬隊摺

光緒二年九月初六日

沈兆瀾請諭摺

光緒二年九月初六日

張家口運糧請部撥款摺

光緒二年九月二十六日

派軍加築東明河隄片

光緒二年十月初四日

永定鳳河各支河工程片

光緒二年十月初四日

蘆商借款展限完繳片

光緒二年十月初四日

驗收英國購到船礮片

光緒二年十月二十日

津關請免解京餉片

光緒二年十一月初九日

撥解吉林洋鎗片

光緒二年十一月初九日

光緒二十八年巨野

近省隄河各工摺  
光緒二十一年十一月初九日

閩廠學生出洋學習摺  
光緒二十一年十一月二十九日  
附清摺二件

東明河隄保案摺  
光緒二十一年十二月十九日

租界旗地津貼豁徵摺  
光緒二十一年十二月十九日

李文忠公奏稿卷二十八

全集一之二十八

桐城吳汝綸編錄

機器局動用經費摺

光緒二十二年八月二十一日

奏爲天津機器局同治十三年光緒元年分動用經費各款援案開單奏報恭摺仰祈

聖鑒事竊查天津機器局經費係奏明動撥海關四成洋稅作正開銷截至同治十二年分止第三次奏報經臣督飭局員將支銷款目查照前兩屆成案開列飭明清單具奏在案該局製造諸務向以洋火藥銅帽爲大宗並籌辦北洋海防購置泰西新式礮械分撥各軍所有應用軍火均由該局取給節經承辦局員升任道吳贊誠候補道劉汝翼津海關道黎兆棠等殫力經營次第開拓措置悉中肯綮該局本有礮礮機器一分續購三分同治十二年

已建成第二廠外十三年後建成第三第四廠分別開礮其淋硝  
磨礮燒炭等處就原有廠房增鑄器具以備出料供四廠之用近  
時後膛鋼礮利用餅藥前已購得六角藕餅藥機器另建新廠試  
造並屬精利得法又購得造林明敦兵馬鎗及中鐵鎗子機器因  
分機器房之半爲洋鎗廠而添捲鎗爐房分銅帽房之半爲鎗子  
廠而添烤銅裝藥房此外熬鍊錫水挾化學之精發水雷之祕與  
夫礮捲銅皮配造拉火並建新廠開辦造成車鑲鑽鋸等牀及購  
自外洋者又三十餘具專製各種子彈各式礮架則就舊廠施工  
復添員匠住房七十餘間儲料庫房十餘間並仿營制於局外四  
而圍築土牆挑挖濠溝既便稽查兼防水源此該局兩年以來增  
置之大略也茲據該道等詳稱動用款目上屆報銷案內原存銀  
一萬八千二百十八兩二錢四分九釐六毫五絲三忽存料約值

銀五萬數千兩同治十三年光緒元年分其領海關四成洋稅銀五十八萬四千二百八十七兩九錢七分三釐五毫收回代造軍火價銀三百三十兩兩年共支用銀五十七萬五千四百九十四兩二錢三分八釐六絲一忽仍存銀二萬七千三百四十一兩九錢八分五釐九絲二忽尙餘一切料物約值銀十九萬三千兩並以遞年承造軍需隨事踵增工繁款鉅皆屬必不可省之費又海洋不能無事必須寬儲料物以濟緩急之需現將本屆用款比較前屆報銷其中酌裁洋匠嚴核工程清付器價均屬有減無增所增惟工料兩項但工皆實在之工料多儲存之料委係撙節動用涓滴歸公並無絲毫浮冒懇仍按照成案開單請銷會詳請奏前來臣查升任道吳贊誠候補道劉汝翼先後經理局務與津海關道黎兆棠商榷妥辦日起有功就歲成軍火而論較前兩年多至

三四倍所用料物亦如之而人工所增不及一倍經費則約增三分之一以之應付直隸淮練諸軍關外征防各營及調援臺灣奉天之師均能儲備有餘取用不匱該道等督率有方洵屬功歸實濟款不虛糜據詳各節臣覆加查核委無捏飾浮冒相應援照向章繕具簡明清單恭呈御覽合無仰懇

天恩敕部查照成案照單准銷實於局務有裨除分咨總理各國事務衙門戶工二部查照外所有天津機器局同治十三年光緒元年分動用經費據實開單緣由理合恭摺具陳伏乞

皇太后

皇上聖鑒訓示謹

奏

謹將天津機器局自同治十三年正月起到光緒元年十二  
月止收支各項銀兩分別款目繕具清單恭呈

御覽

計開

舊管項下

一原存庫平銀一萬八千二百十八兩二錢四分九釐六毫五絲

三忽

新收項下

一收津海關陸續移撥四成洋稅庫平銀五十八萬四千二百八  
十七兩九錢七分三釐五毫

一收烏魯木齊營繳回代造軍火價銀三百三十兩

以上共收庫平銀五十八萬四千六百十七兩九錢七分三



釐五毫

開除項下

一給發采買外洋各色銅鐵鋼鉛點錫儲備大批紫口生鐵及起運各項公司保險輪帆等船價腳庫平銀十七萬二千一百七十六兩二錢一分一釐一毫

一給發采買外洋硝磺鐵水油漆木植一切料物及內地煙煤柴炭等項起運船價夫腳保險庫平銀十五萬七千一百五十七兩三錢七分一毫二絲八忽

一給發仿造外洋廠屋築牆墊土起隄各工并購買外洋水火泥及缸磚瓦石木料等項庫平銀四萬八十三兩二錢五分四釐四毫九絲七忽

一給發清付六角藕餅藥機器價值添購造林明敦鎗及鎗子機

器車刨鑽鋸牀各具價腳保險等項庫平銀五萬四千九百八十二兩六錢三分五釐

一給發員弁司事人等薪水心紅紙張等項庫平銀二萬八千九百六十四兩三錢一分八釐二毫七絲九忽

一給發各廠洋匠薪水工食醫藥煤炭等費庫平銀二萬七千八百六十八兩六錢七分四釐二毫八絲二忽

一給發仿造外洋機器火藥銅帽洋鎗鎗子礮彈拉火等項工匠學徒夫役及隨時添雇土夫木匠等工食庫平銀七萬九千八百七十三兩五錢九分一釐九毫二絲七忽

一給發行營製造局支撥外洋物料添雇洋匠工價並鐵壳舢板巡防薪糧庫平銀一萬四千三百八十八兩一錢八分二釐八毫四絲八忽

以上共支庫平銀五十七萬五千四百九十四兩二錢三分八釐六絲一忽

實在項下

一存庫平銀二萬七千三百四十一兩九錢八分五釐九絲二忽

防庫練軍改練馬隊摺

光緒二十一年九月初六日

奏為遵

旨核議駐防庫倫宣化練軍改練馬隊籌備餉乾恭摺覆

奏仰祈

聖鑒事竊臣欽奉八月初五日

寄諭志剛等奏籌辦添練馬隊餉乾一摺據稱庫倫現籌添練馬隊一百名每年須加餉乾銀三千六百兩此次撤回步兵三百名毋庸補回即於此項內省出之銀抽出三千六百兩撥與直隸練餉局作為添練馬隊餉乾尚可省出運價銀七百六十兩併由張家口糧臺撥交練餉局作為庫防另案加增柴草之項等語著李鴻章核議具奏原摺著鈔給閱看等因欽此遵查原調赴庫倫宣軍步隊八百名馬隊二百名上年於步隊內改練馬隊二百名今

撤回步隊三百名不復換補志剛等原奏擬再於步隊內改練馬  
隊一百名合成駐庫宣軍馬隊兩營五百名步隊二百名其前經  
志剛等奏准每年由部撥交張家口糧臺供支庫防宣軍運糧腳  
價銀一萬四千六百餘兩茲可省出撤回步兵三百名之運糧腳  
價銀四千三百六十餘兩卽於此項內抽出三千六百兩撥歸直  
隸練餉局作爲改練馬隊應加餉乾之用尙餘銀七百六十餘兩  
併由張家口糧臺撥交練餉局作爲庫防另案加增柴草之用等  
因查志剛等改練馬隊係爲邊防得力起見其應加餉乾及另案  
柴草銀兩既有節省運糧腳價撥抵免致直局多籌爲難應如所  
議辦理臣復飭據練餉局司道查得定章馬隊一營內設營官一  
員幫辦官二員字識一名哨官四員幫隊官五員什長二十五名  
親兵二十名正兵二百五名伙夫三十一名馬夫二十二名出防

加夫四十名連應支柴草銀八十兩每營其月需薪公柴草糧乾  
加餉等銀二千五百十兩五錢今合成兩營其月需銀五千二十  
一兩又所留步兵二百名作爲兩哨應留哨官二員哨長二員什  
長十六名護兵二十名正兵一百六十名伙夫十八名長夫六名  
出防加夫三十二名連兩哨應支柴草銀五十六兩其月需薪糧  
加餉柴草等銀一千九十四兩八錢統計馬隊兩營步隊兩哨其  
月需薪糧等銀六千一百十五兩八錢較未改練馬隊百名以前  
原支餉項每歲須添籌餉乾銀四千一百餘兩除未改練以前原  
支餉項已撥解至本年九月底止無庸置議並將撤回步隊三百  
名九月以後餉項另由直局核辦外其駐庫馬隊兩營步隊兩哨  
餉項應請自本年十月初一日改練成軍爲始照章撥放以清界  
限至庫防練軍另案加增柴草銀兩按庫倫上年奏定成案每百

人應加銀十兩今宣軍共駐庫七百餘人應每年自十月起至次年四月止每月加給銀七十兩其需銀四百九十兩連改練馬隊百名應加餉乾統應添銀四千六百兩卽將每年省出撤回步隊運糧腳價銀四千三百六十餘兩統由張家口糧臺撥歸練餉局以爲此項應加餉乾及加增柴草之需尙不敷銀二百數十兩再由直局籌撥等情具詳前來臣覆核無異除咨行照辦外所有核議駐防庫倫宣化練軍改練馬隊籌備餉乾應如志剛等原奏辦理緣由理合恭摺覆

奏伏乞

皇太后

皇上聖鑒敕部查照謹

奏

沈兆澐請諡摺

光緒二年九月初六日

奏爲據情代遞摺仰祈

聖鑒事竊據天津縣人原任浙江布政使沈兆澐之孫刑部主事沈恩紱大理寺丞沈恩官兵部郎中沈恩嘉等呈稱伊祖父沈兆澐於本年七月十七日病故年九十四歲臨歿時自以身受

五朝厚恩愧無報答今當永訣謹具遺摺以鳴戀

主之忱囑令呈交臣處代爲遞奏其時適值臣以會議滇案尙在

煙臺未獲卽時呈請旋據將正摺并草稿齎送前來臣查頭品頂

戴原任浙江布政使沈兆澐由嘉慶丁丑科進士翰林院編修歷

官江南河南浙升浙江布政使筭仕四十餘年歸田以後主講天

津輔仁書院同治庚午重赴鹿鳴筵宴蒙

穆宗毅皇帝賞給頭品頂戴明春丁丑會試又值重宴瓊林之期



正擬循例具呈山

臣奏懇與宴竟以老疾湓逝不獲再光

盛典沈兆澐前在江南服官最久遺愛在人臣於蘇撫江督任內親見士民言及沈兆澐德政猶復稱頌感泣及來天津沈兆澐適主講席與之周旋既久見其年近期頤學行端粹著述等身洵足矜式後進直隸士大夫無不奉爲楷模而臣所深相推敬者尤在咸豐三年固守汴梁一事其時軍務初起人無固志所在官吏見賊披靡迫逆黨北竄攻撲汴城該省撫臣先經出省防剿各路環寇之師爲數甚眾莫敢誰何汴梁不守賊將長驅渡河大局糜爛不可收拾沈兆澐以署理藩司當巡撫之任以兵餉俱絀之孤城當勢微力張之狂寇乃能激勵將士登陴固守閒復縋城殺賊挫其兇鋒卒使危城解嚴局勢一振韓蒙

文宗顯皇帝優詔褒嘉有近來地方官幾不知守土爲何事之

諭是見沈兆法守汴之功不獨中州數百萬生靈賴以保全實乃蔽遮畿輔阻遏賊勢有裨全局湖查咸豐十一年原任太常寺卿唐鑑以退休上請之員經兩江督臣曾國藩代奏遣捐贖蒙加恩予諡有案今沈兆法青年宿學與唐鑑略同其固守汴省之功則爲唐鑑所未逮應如何

量予恩卹之處出自

逾格鴻施非臣所敢擅擬所有代遞沈兆法遺捐緣由謹繕摺具陳伏乞

皇太后

皇上聖鑒訓示謹

奏

張家口運糧請部撥款摺

光緒二年九月二十六日

奏為張家口糧臺預運庫倫來年軍糧應需運腳銀兩請

敕部撥發恭摺仰祈

聖鑒事竊照駐防庫倫之宣化練軍應運兵糧業經庫倫辦事大臣志剛等

奏准即歸張家口糧臺辦理每年由戶部撥交該糧臺運腳實銀一萬四千六百餘兩該大臣等並議於防軍內改練馬隊將省出之撤回步隊運價由張家口糧臺解交直隸練餉局湊放庫防改練馬隊應加餉乾及加增柴草之需又經臣遵奉

寄諭核覆應如所議辦理奉

旨該部知道欽遵各在案茲據張家口糧臺口北道王珩稟稱查駐紮庫倫之宣化練軍向係頭年冬初預運來年春夏二季之糧

夏初預運秋冬二季之糧所有明年春夏軍糧現在亟應雇覓駝  
隻開辦冬運立需銀兩濟用稟請

奏撥前來相應請

旨敕部撥發光緒三年運糧腳價銀一萬四千六百兩以便飭令  
該糧臺委員迅速赴部領回分別辦運湊放餉乾俾應軍用仍俟  
辦運完竣造冊報銷理合恭摺由驛具

奏伏乞

皇太后

皇上聖鑒訓示謹

奏

派軍加築東明河隄片

光緒二十一年十月初四日

再直境東明縣地面上年新築黃河南隄今春又調派淮練各軍一律加築高厚計隄長六十里有奇前將工竣情形奏報並留大名開州練軍六哨就近防汛貴成開州協副將張桂芳認真督率會商大名鎮道及該府縣妥為布置酌派民夫協助一面籌撥銀兩飭令購料備用在案茲據張桂芳等稟稱察看險工地段預做壩埝分派弁兵巡守閘五月二十日以後黃水屢次漲漫出槽溜勢趨向靡定沿隄紛紛生險六月十七七月初四二十二八月十二二十八九月初三等日盛漲陡至隄身水浸五六七八尺不等大溜淘刷壩埝多被墊陷斷及隄情形甚為喫重均經該副將督率在工員弁兵夫不分雨夜相機設法或用大柳捆抵溜頭或用土袋沈護隄腳一面搶鑲壩埝悉力抵禦而九月初三日之漲

正起狂風駭浪驚濤異常洶湧其頂衝處大溜直射隄身埽段隨  
鐵隨墊雙井莊以北等工刷塌隄幫四五十丈不等十分危險晝  
夜冒險搶鑲幸就平穩時過霜降伏秋大汛安瀾等情稟報前來  
臣查東明一帶黃河大溜側重南趨新隄工段綿長且立基於河  
灘浮沙之上若一疏失則前功盡棄後患滋深前飭各營加勁堅  
築並令張桂芳等認真防護今伏秋大汛已過獲慶安瀾築隄防  
汛各員均甚出力容臣查照前奏另行一併擇尤酌懇  
恩施其汛內動用工料銀兩俟核明奏報至開州北岸金隄距河  
尙遠亦臻平穩除飭張桂芳等將新隄衝刷殘缺之處分別核實  
修補外所有東明南岸黃河新隄伏秋大汛安瀾緣由理合附片  
具陳伏乞

聖鑒謹

奏

永定鳳河各支河工程片

光緒二年十月初四日

再靜海縣楊芬港以下接連天津村莊南臨東淀東接鳳河頻遭水患該紳民請集捐開河築隄以工代賑當經委員候選知府史克寬督同勸辦卽自楊芬港勝芳河尾起東至天津鐵頭地挖河一道匯入大清河下歸海河深四尺五寸至六尺口寬六丈五尺至十丈底寬三丈並於沿河北岸築隄高九尺頂寬二丈底寬六丈以免漫溢農田又從永定河下游南岸李家場起自北而南挑河至鐵頭地河深四尺至六尺口寬三丈二尺至四丈四尺底寬一丈二尺至三丈並於沿河西岸築隄高六尺至七尺五寸頂寬八尺底寬四丈以洩永定鳳河之水其計隄河各長五千七百四十餘丈於今夏挑辦完竣又加修上游文霸等處勝芳中亭等河隄工一萬三千三百餘丈修高八九尺頂寬二丈底寬六丈隄坡



栽柳以資盤護飭委候補知府惲桂孫逐細驗收丈尺相符其時正值旱荒附近窮黎得資傭趁除將捐款歸入賑捐項下彙辦外所有在事尤爲出力之紳董都司銜武舉曹開芬都司銜石作璽認真勸辦克成要工實於農田水利大有裨益均擬請賞加游擊銜以昭激勸其次出力武生張廷珍等二名由臣咨部以把總歸標拔補理合附片具陳伏乞

聖鑒訓示謹  
奏

蘆商借款展限完繳片

光緒二十二年十月初四日

再據長蘆運司林述訓詳稱前因京引商人姚學源等京師設立公櫃資本不敷詳經

奏准借給練餉制錢五萬串分作四年歸還均於封廠後呈繳已遵限繳過同治十三年並光緒元年制錢一萬五千串本年應繳錢文屢經飭催如數完繳不容稍有延緩茲據該商等稟稱上年封廠時公櫃尙存鹽一萬四千餘包成本積壓過重今年春夏亢旱銷數愈滯兼之銀價日昂虧賠益多資力更難騰挪求將今明兩年應繳練餉制錢三萬五千串暫行推緩兩年稍紓商力於光緒二年三年各繳制錢八千串四年繳制錢九千串五年繳制錢一萬串連前繳還共符五萬串之數等情據該運司具詳請奏前來臣查本年雨澤愆期銷滯銀貴周轉維艱尙係實情合無

仰懇

恩施准將京商前借練餉錢文除已繳還一萬五千串外下餘推展兩年仍責成運司按年催令依限呈繳不准再有帶欠儻屆限不完卽著落原保商人攤賠如此一推移閒商力較易周轉而於公款仍無出入理合附片具陳伏乞

聖鑒敕部立案謹奏

驗收英國購到船礮片

光緒二年十月二十日

再光緒元年三月間總理各國事務衙門遵令總稅務司赫德來津與臣商購船礮訂立議單旋經該衙門奏請

飭下戶部撥給各關洋稅銀四十五萬兩由臣劄飭總稅務司照議定購二十六噸半礮之船二隻三十八噸礮之船二隻本年四月九日據赫德呈送與英商阿摩士莊訂購礮船四隻合同詳細節略並稱二十六噸半礮船二隻先已造成閏五月初三日自英國開駛約十月可抵天津由總稅務司驗明呈交臣處查收又先准總理衙門函商船水手均係英人俟船到時每船僅留三人教習其餘即須回國所有各船管帶水手等應由臣備人接替等因臣即緘屬福建船政大臣吳贊誠遴選學習駕駛可靠之員赴津候代該礮船二隻於十月初間到津赫德亦由京來津面商

一切十月十二三日臣督同總稅務司等將礮船駛赴大沽海口親加演試所有礮位輪機器具等件均屬精緻靈捷其二十六噸半之礮重四萬四千餘斤口徑十一寸開花彈子重三百九十六斤運礮裝子全用水力機器實係近時新式堪爲海口戰守利器臣因改第一號船名曰龍驤派補用游擊張成管駕第二號船名曰虎威派補用千總邱寶仁管駕該二員均在船政多年於機器礮各學研究頗深令卽會同英國原來弁兵乘坐礮船迅速放洋駛赴福州船廠就近選募管輪管礮舵勇水手等咨由吳贊誠督飭操練以便英國船主水手等交替回國仍與赫德議明每船暫留英人教習三名妥立合同期得觀摩之助以後該船員弁勇夫薪糧及應用一切經費均飭由海防專款內核實開支除俟三十八噸礮船續到後再行核辦並分咨查照外所有驗收英國

購到船礮緣由附片具陳伏乞  
聖鑒謹

奏

津關請免解京餉片

光緒二年十一月初九日

再欽奉

上諭天津關欠解光緒元年洋稅京餉銀十萬兩仍限年內補解清款等因欽此當經轉行欽遵籌解茲據津海關道黎兆棠詳稱津關六成洋稅及洋藥釐捐從前暢旺之時尚係入不敷出歷將奉撥京餉奏准免解近來稅釐減色支絀益甚今年截至十一月第六十五結期滿止連招商局輪船稅約共有銀十二三萬兩洋藥釐捐至十二月止約尚有銀四五千兩而應解惠陵工程銀三萬兩現已起解又代解閩省歸還洋款銀二萬兩已劃抵直屬賑款此外尚有應撥本年十一十二月並來年正二月津郡練軍餉需暨稅務司薪水各項經費等銀約十一二萬兩均係刻不可緩綜計徵收各項一併湊撥仍短銀四萬兩其六成

洋稅自第六十五結起應按一成提出一成備撥出使各國經費更不敷用所有欠解光緒元年洋稅銀十萬兩實係無從籌補請援案奏免補解等情前來臣查此項京餉但可設法補解敢不竭力通籌無如該關稅項入不敷出如奉撥

惠陵工款劃撥直屬賑款皆係至要之需不能不先其所急津郡爲通商要口

京師門戶練軍必不可少防餉斷難減裁且自上年調赴奉天洋鎗礮隊千餘人需餉甚鉅亟應提前籌撥卽稅務司薪水本關經費爲中外員役日用之需亦不能欠緩今河已凍封稅無可收統計該關徵收各項核之用款仍短銀四萬兩委無餘力籌補舊欠京餉戶部亦深知該關稅釐短絀疊經議准免解京餉有案合無仰懇



奏  
天恩准將欠解光緒元年洋稅銀十萬兩照案免其補解俾資周  
轉理合附片具陳伏乞  
聖鑒訓示謹

撥解吉林洋鎗片

光緒二年十一月初九日

再准神機營來咨吉林省請撥馬隊洋鎗五百桿步隊洋鎗一千五百桿並隨鎗配帶等件又洋火藥六千七百五十斤銅帽七十

二萬顆鉛彈十二萬粒

奏明由天津機器局撥給等因查此項馬步洋鎗津局現無存備聞上海地亞士洋行尙存英國恩費而來福新鎗已飭上海機器局就近購辦俟明春開河運解來津約計鎗價並配帶等件及保險水腳共需銀一萬一千兩津局無款可籌現於保定練餉項下移緩就急照數湊撥應請作正開銷其應需洋火藥銅帽鉛彈等項飭由津局照數妥籌備撥除分咨查照外理合附片陳明伏乞

聖鑒謹

奏

近省隄河各工摺

光緒二十一年十一月初九日

奏爲光緒二年附近省城隄河歲搶修工段丈尺動支銀數開單奏報仰祈

聖鑒事竊照附近省城河道隄工如深澤無極祁州安平博野蠡縣高陽等境滋河潞龍河隄任邱縣千里隄安州南北隄雄縣南老隄西槐支河隄趙村壩保定縣清河埝或工段縣長或地居險要皆關民生利害又新開趙王河工長六十餘里節宣西淀盛漲蘆僧河工長一百三十里分減大清河水勢均須認真修防前經奏定每年在於清河道庫河淤地租項下撥銀三千兩以爲各工采購料物搶險之用免其造冊報銷經工部覆准仍令工竣時開單奏報在案本年春間卽飭照數撥給銀兩購備椿料責成清河道葉伯英前往駐工認真督辦閏五月以後陰雨連綿各河同時

盛漲隄壩紛紛出險閒有漫溢之處趙王河受全淀之水情形尤  
爲喫重經該道往來督率竭力搶鑲堵築在事各員亦均不避艱  
險各工漸臻平穩茲據該道會同藩臬兩司將工段丈尺動用銀  
數遵照定章詳報前來除民夫土方等項仍歸民辦外所有搶修  
椿料用款臣逐一確核無浮理合開具簡明清單恭摺具

奏伏乞

皇太后

皇上聖鑒敕部知照謹

奏

閩廠學生出洋學習摺

光緒二十一年十一月二十九日

奏爲選派華洋監督率領閩廠學生出洋學習以儲人才而重防務恭摺仰祈

聖鑒事竊臣葆楨前於同治十二年十一月奏陳船工善後事宜摺內請於閩廠前後學堂選派學生分赴英法兩國學習製造駕駛之方及推陳出新練兵制勝之理速則三年遲則五年擬令船廠監督日意格詳議章程經總理衙門議請

敕下南北洋大臣會商熟籌等因奉

旨依議欽此欽遵在案旋因臺灣有事倥偬未及定議上年臣等籌議海防摺內於出洋學習一事斷斷爲不謀同辭及臣日昌臣贊誠先後接辦船政察看前後堂學生內秀傑之士於西人造駛諸法多能悉心研究亟應遵令出洋學習以期精益求精臣等往

返函商竊謂西洋製造之精實源本於測算格致之學奇才疊出  
月異日新卽如造船一事近時輪機鐵脅一變前模船身愈堅用  
煤愈省而行駛愈速中國仿造皆其初時舊式良由師資不廣見  
聞不多官廠藝徒雖已放手自製止能循規蹈矩不能繼長增高  
卽使訪詢新式孜孜效法數年而後西人別出新奇中國又成故  
步所謂隨人作計終後人也若不前往西廠觀摩考索終難採製  
作之源至如駕駛之法近日華員亦能自行管駕涉歷風濤惟測  
量天文沙綫遇風保險等事仍未得其深際其駕駛鐵甲兵船於  
大洋狂風巨浪中布陣應敵離合變化之奇華員皆未經見自非  
目接身親斷難窺其祕鑰查製造各廠法爲最盛而水師操練英  
爲最精開廠前堂學生本習法國語言文字應卽令赴法國官廠  
學習製造務令通船新式輪機器具無一不能自製方爲成效後

堂學生本習英國語言文字應卽令赴英國水師大學堂及鐵甲兵船學習駕駛務令精通該國水師兵法能自駕鐵甲船於大洋操戰方爲成效如此分投學習期以數年之久必可操練成才儲備海防之用至學生中有天資傑出能習礦學化學及交涉公法等事均可隨宜肄業惟人數旣多道里遼遠非遴選賢員派充監督不足以資統馭而重責成查有三品銜候選道李鳳苞學識閎通志量遠大於西洋輿圖算術及各國興衰源流均能默討潛搜中外交涉要務尤爲練達實屬不可多得之才以之派充華監督必能勝任至訪詢各國官廠官學安插學生延請洋師仍應有情形熟悉之員聯絡維持主客方無隔閡臣葆楨原奏所稱正一品銜閩廠監督日意格前已回國經臣等催調來華商辦一切該員久襄船政條理熟諳於船廠學生情誼亦能融洽以之派充洋監

督必可勝任六月間李鳳苞日意格二員來津稟商臣鴻章適有煙臺之役卽攜該員等同往飭令籌議章程滇案結後曾將該員等所議各節鈔送總理衙門核奪茲經臣等再四討論復與李鳳苞日意格切實核減學生員數以三十名爲度肄習年限以三年爲度實以成效嚴定賞罰出洋經費分年匯解約其需銀二十萬兩此項經費必應籌定有著之款臣鴻章前議由閩省額撥南北洋海防項下酌提動用先儘釐金撥解釐金不敷卽在閩海關四成洋稅項下就近撥旋准福州將軍臣文煜咨稱閩關四成洋稅暫無存款俟第六十五結屆滿再行核數撥解等因新授閩浙督臣何璟過保定時臣與面商一切亦深以爲然茲由臣日昌函致臣鴻章議定由閩省釐金項下籌銀十萬兩閩海關四成洋稅項下籌銀五萬兩船政經費項下勻撥銀五萬兩是此項二十萬



之數均已議有舊案查照分年匯解章程第一年七萬三千兩有奇第二年六萬兩有奇第三年五萬八千兩有奇並游歷及應支教習脩金等費隨時核計撥用力雖甚拮据必能酌量緩急以符定議應請於海防額餉內作正開銷查西洋各國均以中國遣人赴彼學習爲和好證驗前派幼童赴美國英使卽有該國大書院極多將來亦可隨時派往之語秋間滇案議結時臣鴻章而告威妥瑪以擬遣學生赴英學習該使允俟總理衙門知照到日轉致本國外部九月間威妥瑪回國過晤臣復與商明照辦惟該國兵船定例稍嚴聞日本近時已有七人在英兵船學習臣在煙臺閱視洋操卽見有日本武弁在英國鐵甲船隨同操演今議學生分班送往又有郭嵩燾等駐英商辦當無礙難之處至法使白來尼屢以日意格辦船有效爲言此舉亦該使所深願現擬令該監

督等率同學生於明年正月啟行應請

敕下總理衙門迅速分別知照英法駐京公使令其轉達本國妥為照料臣鴻章於本年三月間因洋員李勣協回國之便派令武弁卞長勝等七人同赴德國軍營學習兵技當時未派監督心甚懸念此次李鳳苞出洋飭令該員按三箇月一次由輪車馳赴德國兼查卞長勝等功課並請總理衙門酌量照會德國駐京公使一體知照辦理近自同治十二年籌遣幼童赴美學習之後上年日意格回國臣葆楨遣學生數名隨往遊學本年臣鴻章又遣卞長勝等赴德學習此次又派李鳳苞等率領學生分赴英法兩國從此中國端緒漸引風氣漸開雖未必人人能成亦可拔十得五實於海防自強之基不無裨益謹將臣等籌議船政學生出洋章程及經費數目分繕清單恭呈

御覽仰懇

飭下總理衙門核准施行所有遴員派充華洋監督率領閩廠學生出洋肄業緣由理合會同兼署閩浙總督福州將軍臣文煜新授閩浙督臣何璟恭摺由驛具陳伏乞

皇太后

皇上聖鑒訓示謹

奏

御覽

謹將選派船政生徒出洋肄業章程繕具清單恭呈

計開

一奏派華洋監督各一員不分正副會辦出洋肄業事務俟挈帶生徒到英法兩國時兩監督同察看大學堂大官廠應行學習之處會同安插訂請精明教習指授如應調赴別廠或須更換教習仍令會商辦理其督課約束等事亦責成兩監督不分畛域如遇兩監督分駐英法之時則應分投照顧其華員及生徒經費歸華監督支發洋員教習及華文案經費歸洋監督支發每至年底由兩監督將支發各數會銜造報凡調度督率每事必會同認真探討和衷商榷期於有成萬一意見不合許卽據實呈明通商大臣船政大臣察奪

一選派製造學生十四名製造藝徒四名交兩監督帶赴法國習學製造此項學生既宜另延學堂教習課讀以培根柢又宜赴廠習藝以明理法俾可兼程並進得收速效以備總監工之選其藝徒學成後可備分廠監工之選凡所習之藝均須極新極巧儼仍習老樣則惟兩監督是問如有他廠新式機器及礮臺兵船營壘礦廠應行考訂之處由兩監督隨時酌帶生徒量給其第一年除酌帶數繪外其餘生徒可以無須游歷第二第三年約以每年游歷六十日爲率均不必盡數同行亦不必拘定時日

一選派駕駛學生十二名交兩監督帶赴英國學習駕駛兵船此項學生應赴水師學堂先習英書並另延教習指授鎗礮水雷等法俟由兩監督陸續送格林回次抱士穆德大學院肄習其間並可帶赴各廠及礮臺兵船礦廠游歷約其一年再上大兵船及大

鐵甲船學水師各法約二年定可有成但上兵船之額可按日本派送肄業之例陸續拔充分班派送五六人其未到班者仍留大學堂學習既上兵船須照英國水師規制除留辮髮外可暫改英兵官裝束其費由華監督歸經費項下支給內有劉步蟾林瑛曾二名前經出洋學習此次赴英即可送入大兵船肄業

一製造生徒赴法國官學官廠學習駕駛學生赴英國格林回次抱士穆德學堂並鐵甲大兵船學習應請總理衙門先行分別照會駐京之英法公使咨會本國外務院准照辦理其英國學習各事或再由中國駐英

欽差大臣就近咨商辦理兩項學生每三箇月由華洋監督會同甄別一次或公訂專門洋師甄別並由華監督酌量調考華文論說其學生於閒暇時宜兼習史鑑等有用之書以期明體達用所

有考冊由兩監督彙送船政大臣轉咨通商大臣備核其駐洋之期以抵英法都城日起計滿三年爲限未及三年之前四箇月由兩監督考驗學成者送回供差其中若有數人將成未成須續留一年或半年者屆時會同稟候裁奪總以製造者能放手造作新式船機及全船應需之物駕駛者能管駕鐵甲兵船回華調度布陣絲毫不藉洋人并有專門洋師考取給予確據者方爲成效如一切辦無成效將監督議處

一製造駕駛兩項學生之內或此外另有學生願學礦務化學及交涉公法等事者由兩監督會商挑選就其才質所近分別安插學習支給教習脩金仍由兩監督隨時抽查功課令將逐日所習詳記送核亦以三年爲期學成後公司專門洋師考驗確實給有的確送回供差

一兩監督及各項生徒自出洋以迄回華凡一切肄習功課游歷  
見聞以及日用習接之事均須詳註日記或用藥水印出副本或  
設循環簿遞次互換總以每半年彙送船政大臣查核將簿中所  
記由船政鈔咨南北洋大臣覆核或別國有便益新樣之船身輪  
機及一切軍火水陸機器由監督隨時探明覓取圖說分別繪譯  
務令在洋生徒考究精確實能仿效一面將圖說彙送船政衙門  
察核所需各費作正開銷

一各項生徒如遇所訂教習不能認真指授或別有不便之處應  
隨時訴明華監督會同洋監督察看確實妥爲安置若該生徒無  
故荒廢不求進益有名無實及有他項嗜好者均由兩監督會商  
分別留遣嚴究其員生每月家信二次信資及醫藥等費作正開  
銷或延洋醫或延駐洋欽使之官醫或應另請派撥醫生均於到



洋後酌定萬一因攻苦積勞致有不測之事則運回等費作正開銷並給薪費一年半仍酌量情節稟請附

奏以示優卹如有聞訃丁憂者學生在洋守制二十七日另加卹賞飭該家屬具領

一此次選派生徒應由監督溯查考蹟詳加驗看如有不應出洋濫收帶往不能在官學官廠造就以致剔回者其回費由監督自給儻生徒赴洋後有藉詞挾制情事因而剔回者即將挾制實在情形稟請抵華後查明懲究如咎不在監督者仍開報回費實係因病退回者不在此例

一兩監督和衷會辦當互相體察萬一華監督有敷衍塞責等情弊而洋監督不行舉發或洋監督有敷衍塞責等情弊而華監督不行舉發者咎各相等查有扶同確據即分別照會各行隨時撤

換不必俟三年期滿如果事事實際生徒多優異者將兩監督專摺奏請獎敘

一此次所議章程總以三年學有成效爲限若三年後或從此停止或另開局面均由船政大臣通商大臣會商主裁外人不得干預

謹將出洋監督薪費及生徒經費並分三批匯付銀數開列  
清摺恭呈

御覽

計開

一華洋員薪費項下華監督一員並繙譯一員其薪水每年七千  
六百兩華員雜費每年三千兩洋監督一員薪水每年七千二百  
兩洋幫辦兼文案一員每年二千四百兩華文案以學生陳季同  
兼辦每年一千二百兩洋員並華文案房飯雜費每年四千八百  
兩華文案並習文涉公法所需教  
以上各項俱按照船政向例支  
發七  
一七洋平銀其生徒薪水仍由船政照給該家屬支領等  
程以至法國先約支兩月薪水  
俟按日數造報回華時仿此

一製造學生經費項下每名每年房租並學堂脩膳費約銀一百

二十磅每名行裝費五十磅於起程時先發二十磅到洋時找發三十磅又第二第三年每名年需遊歷費六十磅每名年需剃頭洗衣添購書籍紙筆零用等雜費四十磅以上各項須隨時按英磅作價不能預定銀兩其遊費雜費實支實報不敷者補給如有贏餘退滴歸公另延教習兼教所添脩金每年約以八百磅爲限此款核實支發以原收單黏報

一駕駛學生經費項下每名行裝費及每年房租脩膳費遊費雜費並同前條惟陸續上兵船時每名應給兵官衣資並海圖器具等費其銀一百五十磅既上兵船之後每名每年應增飯食費二十四磅約以二年爲限其未上兵船時另延教習兼教所添脩金每年約以四百磅爲限亦核實支發以原收單黏報

一路費項下若搭西國公司船則華洋監督及隨員緝譯文案五

員坐上等船位

除洋文案一員來回費前已領過

每次約五百三十元生徒坐二

等艙每次約四百元此項船價及渡船火車衣箱稅等費樽節支

報如有不敷俟挪用後稟請補領所帶隨役不准開支公項其往

費於起程時具領其回費於第二批內領二分之一第三批內領

二分之一若派船政官輪船送往則此項路費概不開支

魏瀚陳兆翔二

名行裝回費前已具領

一撥匯日期於華洋監督與生徒起程時先撥第一年薪費及行

裝費往費學生之上兵船衣食費均由華洋監督出具鈐領帶往

支發及起程八箇月再由船政匯付第二年薪費一批及回費二

分之一以後十二箇月又匯付第三年薪費一批及回費二分之

一寄交兩監督收存備用

又分三批匯付銀數

第一年

華洋員薪費每年共七一七洋平銀二萬六千二百兩兩監督及  
繙譯華文案共四員起程以至法國先約支兩月薪水計銀二千  
六百六十六兩不片支雜費俟到洋後扣足在路日數計算將餘  
銀歸公

隨員馬建忠並製造學生十四名藝徒四名共十九名每名房脩  
膳等費年應英銀一百二十磅雜費四十磅行裝費十七名每名  
五十磅共三千八百九十磅內隨員薪水仍由天津發給學生魏  
瀚陳兆翔二名已領行裝

製造生徒另延教習年約脩金八百磅

駕駛學生十二名每名年應房脩膳等費英銀一百二十磅行裝  
費五十磅雜費年應四十磅共二千五百二十磅

駕駛學生另延教習年約脩金四百磅

駕駛學生十二名上兵船衣具圖書費每名一百五十磅上兵船

後每名每年增飯食銀二十四磅全年統其二千零八十八磅

以上五款共英銀九千六百九十八磅以每磅五元作七一

七洋平算合銀三萬四千七百六十七兩三錢三分

往費

監督等五員每員五百三十元  
生徒二十八名每名四百元

共一萬三千八百五十元七

一七合銀九千九百三十兩四錢五分

以上約計第一年總共應領銀七萬三千五百六十三兩七

錢八分

第二年

華洋員薪費每年共七一七洋平銀二萬六千三百兩

隨員並製造學生房脩膳弁雜費年共三千零四十磅

製造生徒另延教習年約脩金八百磅

隨員並製造生徒共十九名每名游歷費六十磅共一千一百四

十磅

駕駛學生十二名房脩膳並雜費年共一千九百二十磅

駕駛學生另延教習年約修金四百磅

駕駛學生十二名每名年增飯食費二十四磅共二百八十八磅

駕駛學生一十名每名年應游歷費六十磅共六百磅

以上七款共英銀八千一百八十八磅合銀二萬九千三百

五十三兩九錢八分

回費二分之一應六千九百二十五元合銀四千九百六十五兩

二錢二分五釐

以上約計第二年總共應領銀六萬五百一十九兩二錢五



釐

第三年

就第二年數內除去駕駛學生月延教習脩金四百磅駕駛學生  
增飯食項下二百八十八磅駕駛學生游歷項下六百磅共應除  
去英銀一千二百八十八磅合銀四千六百一十七兩四錢八分  
兩監督等四員法國起程至回國先約支兩月薪水計銀二千六  
百六十六兩不片支雜費俟回國後扣足在路日數計算將餘銀  
歸公

以上約計第三年總共應領銀五萬八千五百六十七兩七  
錢二分五釐

以上三年統共七一七洋平銀一十九萬二千六百五十兩  
七錢一分外尙有第一年酌帶學生出外量繪游歷費及三

年內華文案並隨員學習交涉公法應支脩金等費未算在內

東明河隄保案摺

光緒二年十二月十九日

奏爲築案酌保加築東明黃河南岸新隄並防汛出力員紳恭摺  
仰祈

聖鑒事竊原直境東明地而上年新立黃河南隄因民力拮据僅  
能堆築成形暫資撫護必須從新加築高厚夯硤堅實方能整齊  
經久但工大費巨民夫旣難再派庫款又無可籌惟有酌用兵力  
臣於今年正月派記名提督劉盛休統率淮軍步隊十四營記名  
提督署正定鎮總兵葉志超署大名鎮總兵許保清開州協副將  
張桂芳各率練軍步隊共六營馳赴工次分認段落著實挑築並  
飭大順廣道督率該府縣妥爲照料派候補道周積駐工監察該  
工本係河灘一片浮沙並有水未消涸之處挑築甚形喫力且值  
天旱薪米昂貴各統領會同地方官分投採購一面親督兵夫實

力趨工層加礮築營哨爭相奮勉灑漿負土往往深夜未休至四  
月底全工告成其隄長六十里有奇築成頂寬三丈底寬十丈高  
一丈四尺又每隔十丈堆土牛一箇其堆土牛一千九十一箇統  
計新加土四十六萬二千四百餘方全隄堅實整齊堪資捍禦因  
伏汛臨邇酌留大名開州練軍六哨就近防守卽派張桂芳督率  
會商大名鎮道及該府縣妥爲布置閏五月二十日以後黃水屢  
次漲漫山漕溜勢趨向靡定六月十七七月初四二十二八月十  
二二十八九月初三等日盛漲陡至隄身水浸五六七八尺不等  
大溜淘刷埽壩多被墊陷齧及隄幫情形甚爲喫重均經該副將  
督率在工員弁兵夫不分兩夜相機設法搶鑲悉力抵禦而九月  
初三日之漲狂風駭浪洶湧異常其頂衝處大溜直射隄身埽段  
隨鑲隨墊雙井莊以北等工刷塌隄幫四五十丈不等晝夜冒險

搶護幸就平穩伏秋大汛安瀾業經臣先後

奏報聲明築隄防汛出力人員另行一併擇尤酌保在案臣維新築黃河南隄所以保衛東南五六百里運道田廬關繫至巨東明一帶大溜側重南趨隄段既長河灘又毫無憑藉非加勁堅築無以禦大汛非認真搶護卽難保安瀾該員弁等施畚鍤於沙水之間捍駭浪於雨夜之候履危蹈險力與水爭卒使工程穩固實屬有裨大局異常出力查東省築隄防汛人員疊經山東撫臣隨摺並分案優保奉

旨允准有案直隸事同一律臣復督飭各統領嚴核刪減謹將築隄防汛尤爲出力各員紳彙爲一案查照東省在獎屬次酌擬獎敘開單敬呈

御覽相應仰懇

天恩俯准給獎以昭激勸其應給五品武銜及千把等項另行咨部註冊理合恭摺具陳伏乞

皇太后

皇上聖鑒訓示謹

奏

租界旗地津貼豁徵摺

光緒二十二年十二月十九日

奏爲查明天津通商口岸英法兩國租界佔用內務府差地租項分別津貼豁徵恭摺仰祈

聖鑒事竊准內務府咨開英法兩國佔用坐落天津縣內務府差地請將盈餘租項作爲津貼該縣通商之需應自行奏明辦理至咸豐十年十一年租項應查明如何拖欠其佔贖地畝未便除租等因當經轉飭去後茲據天津縣知縣蕭世本詳稱英法兩國租界佔用莊頭李連城等差地一頃八十畝二分四毫四絲雖議每畝交租錢一千至一千五百文按莊頭原交內務府每畝租銀二錢八分稍有盈餘惟該縣辦理中外交涉事件需費甚多業經前通商大臣崇厚飭將此項盈餘租錢作爲津貼該縣通商之需歷年照辦有案原係以公濟公仍於內務府原額每畝租數並無欠

缺自應照案辦理至該兩國雖自咸豐十年佔用地畝至十一年始能勘辦同治元年始據認租其咸豐十年十一年租項本未認交迄今事隔多年更難憑空令其補納應請免議至佔贖莊頭李連城等餘地八十八畝八分四釐一毫一絲內有紫竹林廟地五畝又廟前街道同房基地五畝七分五釐又小道二段合地一畝六分八毫自通商以來均成往來大道又兩國於咸豐十一年先後起蓋洋房取土燒甌已成溝濠暨洋行起卸貨物已成大路地二十三畝一分六釐八毫一絲又無主墳地三畝房基地十畝三分一釐三毫雖不在佔用之內而地近洋行久已挖毀以上其地四十八畝八分三釐九毫一絲招佃多年無人承認實係廢壞不堪耕種計每年應完租銀十三兩六錢六分四釐又法國仁慈堂生利洋行車道歷佔莊頭李玉璽差地五分一釐六毫每年應完



租銀一錢五分五釐自咸豐十年起均應一律豁免以免民累其餘李連城等地四十畝二毫又李玉璽地六分三釐七毫五絲尙堪耕種應仍自咸豐十年起按年催追租項等情具詳前來臣覆核係屬實情應如所請分別辦理除將應徵租銀如數徵解外理合恭摺具陳伏乞

皇太后

皇上聖鑒敕下內務府查照謹

奏

李文忠公奏稿卷二十八

李文忠公奏稿

卷之二十九目錄

籌議臺灣事宜摺

光緒三年正月十六日

勦平煽勇滋事之會匪摺

光緒三年正月十六日

覆陳盛軍潰勇情形片

光緒三年正月二十一日

創辦克鹿卜礮車馬乾片

光緒三年二月二十四日

盛宣懷引見片

光緒三年二月二十四日

東明縣改爲沿河要缺摺

光緒三年三月十一日

孝女王氏事績片

光緒三年三月十一日

張家口糧臺請餉摺

光緒三年三月二十五日

奉省無庸添隊片

光緒三年三月二十五日

庫防改車運摺

光緒三年三月二十五日

蘆課請緩奏銷摺 光緒三年三月二十五日

直隸賑捐數目摺 光緒三年四月二十九日

奏留丁壽昌片 光緒三年五月二十八日

馬復震請卹摺 光緒三年五月二十八日

查明霸州營田摺 光緒三年六月十九日

淮軍軍需報銷摺 光緒三年六月十九日

軍需交涉洋務報銷片 光緒三年六月十九日

議升耐興禮摺 光緒三年七月初一日

開采科爾沁鉛礦片 光緒三年七月十四日

借撥晉賑摺 光緒三年八月初八日

籌辦平糶片 光緒三年八月初八日

奏保丁壽昌片 光緒三年八月初八日

籌撥晉豫賑款摺

光緒三年八月二十三日

籌辦晉賑片

光緒三年八月二十三日

海防經費免再抽撥片

光緒三年八月二十三日

津關欠解京餉請免解片

光緒三年八月二十七日

李文忠公奏稿卷二十九

全集一之二十九

桐城吳汝綸編錄

籌議臺灣事宜摺

光緒三年正月十六日

奏為遵

旨籌議臺灣事宜仰祈

聖鑒事竊臣前奉光緒二年十一月十九日

上諭丁日昌奏臺灣事宜應統籌全局並省臺勢難兼顧及舉辦礦務艱務各摺片著該督等籌商議奏等因欽此查臺灣情形沈葆楨曾躬親其事見聞最熟既承

諭旨垂詢諒必有擘畫盡善之策臣近為籌度琉球距臺北千餘里現日本分兵踞琉球難保不斷思吞嚙日斯巴尼亞所屬之小呂宋距臺南亦僅千數百里現日國聲稱調兵船來華難保不徑

圖窺伺幸有丁日昌赴臺密速布置欽奉上年十二月二十二日  
密諭已調孫開華方耀所部各營陸續赴臺臣又商催吳贊誠將  
赫德代購之龍驤虎威兩礮船由閩駛往協防藉可虛張聲勢丁  
日昌所擬辦法以靜待動以柔克剛萬一遇有外侮當能操縱合  
宜不至遽有戰事此目前之可勿深慮也若夫臺灣經久事宜應  
以舉辦礦務懇務為興利之大端雞籠煤礦開采已有端緒硫磺  
煤油樟腦茶鐵諸利亦應逐漸招商開拓或借官本或集公司該  
撫所稱十年後成本可還二十年後庫儲可裕殆非虛語招墾人  
多則經費必多似須量力經營不設限制江海各關協撥餉皆  
屬入不敷出擬請

敕部於各關解部四成及所存招商局稅項酌量借助若干由丁  
日昌於興利收回成本時陸續解還部庫歸款至鐵路電綫二者

相爲表裏無事時運貨便商有事時調兵通信功用最大東西洋各國富強之基胥賴此以充拓丁日昌到臺後歷次所稱該處路遠口多防不勝防非辦鐵路電纜不能通血脈而制要害亦無以息各國之垂涎洵篤論也惟鐵路需費過鉅似須煤鐵開采有效就地取料工力較省陸路電纜則移省廈已成之器爲之亦尙易爲至購鐵甲船練水雷軍不獨臺防當辦南北洋海防尤爲亟務臣因海防奉撥額款報解無多尙不敢遽行定購去年議訂美國黎約翰新式魚雷五十具並傳授製法用法其索價五十萬兩擬招令來津面試如果精利無敵當酌予收買分給鐵甲船則須道員李鳳苞帶同廠學生至英國後詳細查勘議辦其價過昂不得不格外慎重也丁日昌辦事認真不避勞怨惟近日肝病頗劇求效過速若欲諸務同時並舉斷無此財力若分緩急先後擇要



以圖數年當有起色所請專派重臣督辦一節似不如責成該撫一手經理俟辦有成效再議督撫輪駐近閩邸鈔袁保恆請改福建巡撫爲臺灣巡撫雖事有專屬而臺地兵事餉源實與省城呼應一氣分而爲二則緩急難恃臺防必將坐困亦非計之得者愚昧之見是否有當理合恭摺由驛密陳伏乞

皇太后

皇上聖鑒采擇施行謹

奏

勦平煽勇滋事之會匪摺

光緒三年正月十六日

奏爲會匪煽勇滋事勦捕平息情形恭摺仰祈

聖鑒事竊臣於正月初六日接據總統盛仁各營天津鎮總兵周盛傳稟稱該處有哥老會匪趁新年停操潛煽營勇入會經該鎮查知卽於初一日拏獲匪首何松桂一名正在訊辦聞忽於初三夜定更後聞營外譁擾中軍前營前軍右營勇丁有越牆應之者當飭各營堅壁勿動該會匪潰勇等乘夜燒掠營外買賣街向西南逃去該鎮慮其逸脫滋蔓當夜親督馬步隊跟蹤追剿不令貽害他處等情臣接閱此信卽派署通永鎮總兵吳殿元營務處山東候補道吳秉權馳往該營駐紮之小站地方查詢確情去後旋接周盛傳稟稱自初三夜聞營隊跟追黎明該匪見馬步隊緊躡其後不敢徑趨大道折向濱海狂奔喘息不停沿途未入村鎮肆

擬該鎮窮一日之力疾馳百五十餘里追至滄州鹽山交界地方  
逾兩減河將會匪潰勇捕斬擒獲盡數殲除始行收隊於初五日  
回營鎮撫等情又據駐防滄州提督丁德昌分防鹽山副將張遠  
富稟報竄匪剿盡地方安靜情形大略相同復據吳殿元吳秉權  
查明稟報委因該營查獲會匪頭目餘黨懼搜捕窮治倉卒勾勇  
逃逸閱時一晝夜立即殄平該鎮道等復親詣各營察看營牆礮  
械等件均無損失惟查點中軍前營前軍右營勇數各失去百餘  
名買賣街門面房屋數處被火其餘按堵如常日來照舊操練等  
語又據周盛傳連日訊取擒獲各供並所獲會匪號記錦囊等件  
呈送前來臣查哥老會匪近年分散各省以同財結義爲名入會  
者各給寸布爲記閒有混入營伍者淮軍勇丁向因稽查嚴密尙  
無人會情弊此次該營倉卒譴擬固由停操度歲營門出入稽查

稍鬆會匪潛伏買賣街致被勾誘而中軍前營前軍右營勇丁逃失遂至百餘名之多該兩營營官事前不能覺察臨時不能禁止實屬駕馭無方業由周盛傳撤去管帶差使相應請

旨將中軍前營營官提督銜記名總兵姚禮士前軍右營營官記名提督張九林均卽革職以示懲儆周盛傳總統全軍未能隨時查察亦有應得之咎惟該鎮平日馭軍嚴整去年秋冬因用心過度遽患咯血曾經請假離營並以將才難得勸令在營休養數月以來勢難處處督查致有疏虞尙幸追勦迅速僅一晝夜聞竟能捕獲淨盡未致滋擾貽患功過尙足相抵近聞日斯巴尼亞國屢有謠傳該營爲海防大枝勁旅操演西洋鎗礮均就嫻熟此次小失旣未搖惑大隊擬請寬免該鎮處分令其勤督操練以備緩急而觀後效再查近年淮軍各營餉源枯竭每歲僅能發餉九關弁

勇苦累實甚盛軍駐防津沽附近地面操練旣勤又累歲修築新城礮臺各巨工繼以開河屯田終年不少休息筋力過勞口糧又少故會匪易於煽惑尙賴各營將弁並無剋扣激變情事是以軍心不搖現已飭令該鎮將河工屯田暫行停緩專事操練認真整頓用備調遣所有會匪句勇滋事應時剿捕平定情形理合恭摺具陳伏乞

皇太后

皇上聖鑒謹  
奏

覆陳盛軍潰勇情形片

光緒三年正月二十一日

再會匪煽勇滋事剿捕平息情形臣於正月十六日據實馳奏在案嗣奉正月十七日

寄諭御史王昕奏天津新城一帶營勇前歲曾經滋事本年正月初復聞譁潰數營之多一路搶掠竄入東省等語著飭沿途地方文武一體查拏等因又奉正月十八日

寄諭據奏前營右營各散去百餘名恐尚不止此數該勇丁究竟竄往何處著派員迅速查明咨行經過省分督撫一體嚴拏等因欽此伏查正月初三夜滋事匪勇據報初四日申刻即經追捕撲滅淨盡臣初亦疑其尚有不實不盡先派署通永鎮總兵吳殿元候補道吳秉權馳赴該營查點勇數實只失去二百餘名該鎮道等復親赴滄鹽交界接仗處所及潰勇經過村莊逐一查詢居民

並無見有竄匪逃出搶掠之事臣又續派署天津鎮總兵鄭國魁馳往該營查看稟報實情相同臣又令統領銘軍記名提督劉盛休由保定回山東張秋軍營之便沿途查探據報自滄州南至東境一路安靜如常行旅居民皆未見有潰勇結隊經過臣又密派保定親兵營馬隊哨官王鼐查至山東平原黃河一帶回報毫無蹤影又據正月間南來會試舉人吳慎旃等過謁均稱沿途並未聞見匪勇搶掠滋事是周盛傳原報全數撲滅不至貽害他處尙屬信而有徵該御史所奏前歲曾經滋事臣歷年在津目覩實無滋事案據卽本年正月初三夜潰逃僅兩營內二百餘人更無數營之多亦無竄入東省之事推原其故皆由津郡五方雜處謠言最多傳播失實聞者不察遂據以入告臣向來奏報軍情必加慎重不敢稍有掩飾此次出事十餘日

之久派員查詢四五次之後乃據實專疏上

聞既經查訪明確並無竄往他省自不必再加咨行轉涉張皇而  
滋紛擾合再據實覆陳仰慰

聖廬謹附片具

奏



創辦克鹿卜礮車馬乾片

光緒三年二月二十四日

再海防銘盛各營及親軍礮隊自同治十年以後陸續籌款添購德國克鹿卜後門四磅鋼礮一百十四尊雇用德國教習選派礮勇照該國操礮章程認真操演此項礮位取準及遠精利無匹在西洋各國最爲著名利器每礮一尊及前車零件子藥箱應用拉馬六匹礮目一名騎馬一匹共馬七匹行軍時礮勇馬夫皆須乘坐前箱後架及拉礮鞍馬之上平日操練進退旋轉必須人馬相習馬匹尤必調良方能隨機應變電掣風馳現當籌辦海防各礮前車均已購製齊備分發各營兵勇礮法亦漸操習精進當於光緒二年六月間

奏請飭派提督唐立業出口購到新馬三百匹先行按照各軍領礮多寡均勻攤派暫資操演計分給盛軍拉礮馬七十匹銘軍二

十七匹親兵前營一百三十三匹護衛營五十六匹樂字營十四匹按每馬七匹量給馬夫兩名其計拉礮馬三百匹新募馬夫八十六名其夫馬口糧喂養仍核照淮軍馬隊向章每夫四匹均日給銀一錢從上年十月初一各營領齊馬匹之日起支據淮軍糧臺直隸練餉局司道會詳請

奏前來臣查德國營制以礮六尊爲一小營每礮出征有正車副車正車用馬六匹副車用馬六匹連礮日坐騎每礮其須馬十三匹此外尙有餘馬預備隨時補換每一小營用木鐵兩匠砧鏽器具車一輛伙食車一輛行李車一輛及營官號令坐騎之馬其計用馬六十二匹馬夫五十六名現操礮隊既仿該國營制應需夫馬本難刪減惟餉項支絀不能不酌量變通以歸撙節其行李伙食兩車現無戰事擬暫裁去營官號令坐騎及備換之馬亦擬緩

給其副車及砧鑪器具車爲行陣必不可省之件就現有礮位計  
算副車應用馬六百八十四匹砧鑪車應用馬一百十四匹擬俟  
車輛造齊隨時酌核添備目前每礮一尊僅止用馬七匹實已無  
可再省此次唐立業購到馬三百匹按礮一百十四尊分配每礮  
七匹計尙少馬四百九十八匹應卽續行采購俾資訓練而成勁  
旅至各營礮勇專習技藝隨礮器具繁多又須責成經理勢難兼  
顧槽牧德國用夫甚多現擬礮目騎馬一匹暫令自行喂養計每  
馬三匹給夫一名係屬著實核減以上各節均仿照德國營制參  
酌淮軍向章量加變通於講求利器之中仍寓撙節餉需之意現  
在創辦伊始應需馬乾夫糧部臣無案可稽相應請  
旨敕部立案作正開銷以重軍儲而昭核實理合附片具陳伏乞  
聖鑒訓示謹

奏

盛宣懷引

見片

光緒三年二月二十四日

再布政使銜直隸儘先補用道盛宣懷歷經臣奏調軍營差遣同治十一年創辦輪船招商局因該員留心洋務熟悉情形委令會同道員朱其昂唐廷樞等妥爲籌辦數載以來招徠商股承運漕糧去冬復建議因併美國旗昌洋行爲收回利權之計辦理日有起色光緒元年冬又經臣會同江楚各督臣奏派該員督辦開采湖北煤鐵礦務經營伊始端緒漸彰嗣值煙臺議結滇案英國使臣威妥瑪求臣派員商辦吳淞鐵路復奏派盛宣懷前往會議辦結經南洋大臣沈葆楨奏明在案茲飭調來津籌商一切據該員稟請就近赴部聽候帶領引見等情臣查盛宣懷心地忠實才識宏通於中外交涉機宜能見其大其所經辦各事皆

國家富強要政心精力果措置裕如加以歷練必能幹濟時艱惟事體關係重大自應需之歲月功效始著此次引

見到省後仍擬飭令回局悉心經理藉資指臂之助除給咨赴部外理合附片陳明伏乞

聖鑒敕部查照謹

奏

東明縣改爲沿河要缺摺

光緒三年三月十一日

奏爲知縣中缺現有河道隄工請改爲沿河要缺以期擇人而理恭摺仰祈

聖鑒事竊照大名府屬東明縣知縣一缺距省城千餘里壤接山東曹州民情素稱强悍本非易治自咸豐五年河南銅瓦鎮黃河決口改道北行該縣適當其衝遂落於河之南岸歷年重遭水患地方凋敝閭閻困苦獄訟滋多凡撫恤災荒緝捕盜賊審理案件在在均關緊要繁劇情形數倍往昔而河流洶湧左奔右突尤應設法籌防上年又於境內新築南隄一道縣互六十餘里每歲修防事宜更形繁重本爲難治之區又有防河之責非通曉吏治諳悉河務者斷難勝任該縣原係繁難二字中缺向例按班選補但此項照例輪補人員情形既多生疏河工亦非素習實虞貽誤必

須因地制宜改爲繁疲難三字沿河要缺嗣後卽照沿河州縣之  
例遇有缺出遴選妥實可靠之員分別調補庶幾治理得人查定  
例丞倅牧令簡缺改繁應於丞倅牧令繁缺內改一簡缺蓋因政  
務繁簡偶有不同地方事宜初無二致故可互相調換若東明本  
無河道隄工乃黃河由他省遷徙而來又新築長隄六十餘里今  
昔事勢懸殊非僅因政務偶有繁簡者可比且現在丞倅牧令繁  
要沿河各缺中查無可改中簡之缺直省差繁事劇州縣多屬衝  
難若遷就互換勢必顧此失彼自應變通辦理據司道府具詳請  
奏前來合無仰懇

天恩俯念河工重要准將東明縣知縣改爲繁疲難三字沿河要  
缺免其互換以裨地方再該縣現經出缺應飭司暫行照例詳補  
俟此案奉部覆准後再照新章察看合併聲明理合恭摺具陳伏



乞

皇太后

皇上聖鑒訓示謹

奏

孝女王氏事績片

光緒三年三月十一日

再據涿州知州吳履福詳稱寄居涿州之孝女王氏江蘇高郵州人原任工部尙書王引之之孫女原任湖北漢黃德道王壽同之女幼而端淑讀書通大義能詩文喜誦劉向列女傳及木蘭詩年十一見母康氏病篤虔禱於神乞減己算以代十三歲時父母議爲許字該氏微聞其語立起入室引錐刺臂血作書道撤環事親之意父母皆大驚遂緩其議及年十八父母又欲議婚該氏又刺血爲書辭旨愈烈咸豐壬子王壽同與次子恩晉殉難武昌歸櫬高郵該氏泣曰母在兒不得從父死請取兒血漆棺乃引刀割臂血淋漓注入漆中見者錯愕父喪旣畢年已二十六矣母兄仍欲擇配該氏泣稱父在已從吾志今乃無父願守母終身母兄不能奪也其後兄弟蒙

卹蔭並官京師該氏侍母就養僑寓涿州母康氏飲食衣履必自其手不假他人逾年弟內閣中書王恩炳卒該氏以母憂傷之餘重遭此變百計解譬以塞其哀同治元年母遭危疾羣醫束手該氏割左股以進未一年母疾又作又割右股以進皆愈自是博考方書自難經素問下逮經驗醫方無不纂錄試之多效喜曰七足以壽吾母矣是後八九年母或小疾該氏治之輒痊不痊則焚香數寸著肢體燃之取灰煎服百投百效該氏以此身無完膚同治十一年母病已革知不起諭家人善守該氏勿令再割股該氏侍疾百餘日不交睫目盡腫赤母卒絕粒三日家人強勸乃肯進粥居喪如禮逾年兄兵部郎中王恩錫客死河南該氏聞之愈慟親往扶柩送歸高郵又逾年復來涿扶母喪南歸家貧道遠往返數千里營葬兩喪有男子所不能及者其篤孝至性寓涿最久涿人

耳目切近遠邇傳播詳送事實清冊並取具同鄉官印結援案請

旌等情前來臣查該孝女王氏自高曾以來世爲儒臣海內宗其學術其父王壽同父子殉節忠孝萃於一門該氏毓自名家少成若性用能堅苦卓絕立志較然洵爲無忝前光足以維持風化相應請

旨敕部旌表以彰貞孝除冊結咨部並咨江南督撫臣查照外理合附片具陳伏乞

聖鑒訓示謹  
奏

張家口糧臺請餉摺

光緒三年三月二十五日

奏爲張家口糧臺采辦各路軍糧懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨任張家口設立糧臺采辦各路軍糧奏明請撥部餉以爲米價

繩袋員役薪工之需自同治九年十二月起九次奏撥部餉銀二

十七萬兩飭委口北道分起采辦截至光緒二年年底止實存正

款餘平共銀二萬二千餘兩均經造報在案茲據口北道玉珩稟

稱前存之銀已於上年冬閒爲烏城各軍采買今年春夏二季之

糧本擬年前雇駝啟運因駝隻多患脫掌經察哈爾都統咨商烏

里雅蘇臺將軍等俟今年牛車開運同秋冬二季之糧一併解往

現交夏令牛車陸續開行本年秋冬之糧必須及時采買以便一

同起運其駐紮庫倫之宣化練軍米麵亦應備繩袋裝妥併用牛車運發以期無誤兵需惟餉銀無存請速爲奏撥等情前來臣查該道所稟係屬實情相應仰懇

天恩敕下戶部照案續撥餉銀三萬兩仍飭該糧臺迅速派員領解以濟要需理合恭摺具陳伏乞

皇太后

皇上聖鑒訓示謹

奏

奉省無庸添隊片

光緒三年三月二十五日

再臣前奉

寄諭崇厚奏請調直軍洋鎗馬步隊三營並十二磅開花礮車六輛著卽派撥赴奉等因欽此遵查直省練軍已有馬步隊三營一哨調防奉省現存各營巡防要地在在不敷分布餉需又甚支絀本難再調惟奉省爲根本重地不得不設法通融經臣與崇厚往復兩商業將天津練軍左營洋鎗步隊四哨派游擊鄭明保管帶卽令操江鎮海輪船兩號分裝駛赴大東溝登岸至奉省鳳凰城歸隊連該營原留奉防一哨合成一營聽崇厚節制調遣至十二磅開花礮前已撥去六尊並隨帶兩輪車及拉礮馬十二匹迄今仍留奉防計行仗足敷應用無須再行添撥其餘軍火帳房等項由津撥發所需月餉加餉柴草價查照成案飭局核給按時籌撥

解濟至直軍馬步隊先後調防奉省四營應俟該省練軍就緒或  
邊防稍鬆卽陸續遣撤以免畿疆空虛除分咨查照外理合附片  
覆陳伏乞

聖鑒謹

奏



庫防改車運摺

光緒三年三月二十五日

奏爲張家口糧臺辦運庫防軍糧米改爲車運以節經費並請  
敕部撥發來年運腳銀兩恭摺仰祈

聖鑒事竊照駐防庫倫之宣化練軍應運兵糧前經庫倫辦事大  
臣志剛等

奏准改歸張家口糧臺辦運每年由戶部撥交該糧臺運腳銀一  
萬四千六百兩該大臣等並議於防軍內改練馬隊將省出之撤  
回步隊運腳銀四千三百六十兩由張家口糧臺解交直隸練餉  
局湊放庫防改練馬隊應加餉乾及加增柴草之需又經臣遵奉  
寄諭核覆應如所議辦理奉

旨該部知道欽遵在案茲據張家口糧臺口北道玉珩詳稱駐庫  
宣軍應需米麪前由庫倫飭調所屬蒙古駝隻來口馱運酌給官

價今改歸張家口糧臺運送必須雇用民駝查定例運送軍糧以  
百里爲一站口外馬騾馱運每石每站給銀三錢車運每石每站  
給銀四錢張家口至庫倫四十八站馱運每石計需銀十四兩四  
錢車運每石計需銀十九兩二錢又查同治十一年光緒元年察  
哈爾都統雇駝代運烏里雅蘇臺各營軍糧至四十五臺之哈爾  
呢墩交替每石腳價銀五兩三錢及四兩不等同治十二三年光  
緒元二年察哈爾都統雇牛車代運軍糧至哈爾呢墩每石車價  
銀四兩九錢五分至三兩三錢不等是例價實多於時價應照時  
價雇辦張家口至庫倫較至哈爾呢墩多三站卽以至少之時價  
核計馱運每石約需銀四兩三錢車運每石約需銀三兩六錢是  
車運又省於馱運且上年冬閒駝患脫掌雖有倍徒之價無從雇  
兌是以烏城各營軍糧經察哈爾都統咨商暫時停運俟今年改

用牛車所有駐庫宣軍米麵應卽雇牛車運解仍候雇定實需腳價若干有無長落隨時報部立案年終與烏城各軍米價等項造冊請銷向來該軍運米以一石爲一袋麵以一百二十五斤合一石爲一袋庫倫現駐宣軍馬隊五百名步隊二百名連夫役共九百三十八名每年應運米麵三千四十袋計需車價銀一萬九百四十四兩若於部撥銀一萬四千六百兩內解交練餉局銀四千三百六十兩僅留糧臺銀一萬二百四十兩殊有不敷應請留銀一萬一千兩其餘三千六百兩由糧臺解交練餉局添放庫倫改練馬隊應加餉乾及加增柴草之需短解之銀由該局添籌應用若有閏之年應加運米麵二百五十四袋約需運腳銀九百兩請由部添撥至牛車行運係在夏秋草長之時所有該軍本年四季並明年春夏之糧現定自四月初開起陸續運發應需光緒三年

腳價銀兩已於去年領回其預運光緒四年軍糧運腳銀兩應請  
卽行奏撥再此項軍價係按市平給發張家口市平大於庫平上  
年領到戶部銀一萬四千六百兩係按二兩平撥給較庫平短銀  
八百七十六兩實屬不敷開支此係按照時價實用實銷之款比  
例價所省數倍應請放給庫平並將前短平銀補發以免賠累等  
情具詳前來臣查該道所詳係爲撙節經費核實報銷起見來年  
之糧既須今年夏秋運送相應仰懇

天恩敕部撥發光緒四年運糧腳價庫平銀一萬四千六百兩並  
前次短平銀以便該糧臺委員迅速赴部領回趕辦俾無遲誤理  
合恭摺具

奏伏乞

皇太后

皇上聖鑒訓示謹  
奏

蘆課請緩奏銷摺

光緒三年三月二十五日

奏爲援案請緩長蘆本屆正課發銷以紓商力恭摺仰祈

聖鑒事竊據護理長蘆鹽運使馬繩武詳稱蘆商正課例限五月

奏銷自同治十年後遇災歉節經詳請

奏准緩至十月啟徵茲以例限將屆催令各商完納據通緝商人  
誠利生等稟稱近年本重銷滯商累過深幸蒙推緩奏銷藉資補  
救乃去歲全省荒旱硝鹽太多官鹽幾至停秤綱情疲困已久收  
效勢難剋期今各岸存鹽壅滯標項無從周轉且上屆正課尾欠  
並帑利銀兩尙須補交春運又須趕辦若本屆新課同時並徵商  
力實不能支懇仍援案展緩該護司詳加體察委係實情若將本  
屆正課依限奏銷恐致課運兩誤請仍緩至十月啟徵等情具詳  
前來臣查長蘆正課前因商力艱窘疊請展緩均經奉

旨允准而應撥京奉各餉仍係年內湊解清款並無貽誤今旱荒  
之後商力未紓該護司援例請緩係爲恤商顧課起見相應籲懇  
天恩俯准將光緒三年正課奏銷照案緩至十月辦理屆時由臣  
督飭運司實力催徵無誤本屆額撥京奉各餉以期兼顧理合恭  
摺具

奏伏乞

皇太后

皇上聖鑒訓示謹  
奏

直隸賑捐數目摺

光緒三年四月二十九日

奏爲查報直隸收過賑捐應獎數目恭摺仰祈

聖鑒事竊上年畿疆被旱較廣窮黎糊口維艱除蒙

特恩撥給銀米賑撫外並經臣奏明飭屬勸諭紳商富戶量力集  
捐以資濟助奉

旨著照上屆賑捐章程核給獎敘等因欽遵在案旋據本省官民  
陸續輸助並有外省官捐鉅款截至本年二月底止共收過銀十  
六萬三千六百十七兩五錢六分七釐五忽六微津錢二萬五千  
九百六十二串九百五十文按三千五百文合銀一兩計銀七千  
四百十七兩九錢八分五釐七毫一絲三忽大米五百石每石合  
銀二兩五錢計銀一千二百五十兩小米五千六百二十三石八  
斗一升六合九勺每石合銀一兩八錢計銀一萬一百二十二兩



八錢七分四毫二絲高粱四千二百七十石九斗每石合銀一兩五錢計銀六千四百六兩三錢五分棉衣二萬五千五百三十件每件合銀一兩計銀二萬五千五百三十兩統其合銀二十一萬四千三百四十四兩七錢七分三釐一毫三絲八忽六微其已奏報之湖南北官捐銀六萬兩江西廣饒九南道沈保靖捐銀六千兩併計在內均經隨時分撥順直各災區核實散放並以工代撫災民藉免飢餓此外尙有捐辦工撫未經截數之款應俟事竣截數奏報茲據籌賑總局司道查明二月以前收數具詳前來除將動支數目另行查核開單彙報並飭取各官民履歷照章咨部核給獎敘其有外省自行奏咨給獎者卽於獎案內開除所有收過直隸賑捐應獎數目理合恭摺具陳伏乞

皇太后

奏  
皇上聖鑒敕部知照謹

奏留丁壽昌片

光緒三年五月二十八日

再遇缺題奏按察使前任天津道丁壽昌丁憂服闋臣於本年二月間奉到

寄諭天津爲畿南重鎮地方緊要所有彈壓兵勇綏靖地面必須有熟悉情形之員方能得力飭調該員赴津差遣等因欽此當經欽遵札調昨該道於三月初十日由籍起程四月二十七日行抵天津經臣委令總理營務處事宜並派充海防翼長該道途次感冒風寒日來尙未全愈一切地方營務臣尙未與籌商旋奉五月二十四日

諭旨崇厚銘安奏調該員赴吉著臣飭令前往等因臣查吉林吏治武備均須整頓使於直隸無損於吉林有益臣自應統顧兼籌斷不敢稍分畛域惟崇厚等原奏係屬因地擇人臣愚以爲用人

之道亦須擇地

前諭熟悉情形方能得力實量才授任之要端丁壽昌於淮軍營務津郡地面均能熟悉久在

聖明洞鑒之中臣處辦理海防需才甚殷該道在津必可集思廣益有裨時艱若令前赴吉林民情地勢素未諳習即使認真整頓誠恐遷地弗能爲良該道久任地方舊部員弁早經先後散遣實已無可酌帶合無仰懇

天恩垂念海防要政畿輔重地以得人爲亟仍准丁壽昌留津差遣庶才地兩得其宜微臣亦藉收指臂之助所有前後奉到

諭旨理合附片覆陳伏乞

聖鑒訓示謹

奏

馬復震請卹摺

光緒三年五月二十八日

奏為總兵籌辦海防積勞病故奏懇

加恩優卹恭摺仰祈

聖鑒事竊照總兵馬復震管帶操江火輪兵船辦理北洋海防於光緒二年十二月二十三日在海防軍營積勞病故先據天津司道聯銜詳稟正在飭查履歷核奏請

卹間接准部咨光緒三年四月初七日奉

上諭廣東陽江鎮總兵員缺著馬復震補授欽此茲據總兵陳南波參將夏靖軒操江輪船隊總都司曹良臣等稟稱馬復震自咸豐十年經前兩江督臣曾國藩檄令募帶震字一營名曰淮勇是年賊首黃文金大股上犯曾國藩困守祁門該總兵扼祁西樞根嶺次年會合諸軍禦賊石門礮追奔三十里圍攻徽州拔統領唐

義訓於重圍壘克黟縣徽郡又大捷屯溪岩市以解徽州之圍大捷孔靈以復績溪祁門兩縣旋經左宗棠調赴浙營改爲楚軍皖勇扼守分水截賊於紫溪麻車埠一帶從攻餘杭三戰三捷餘杭旣克追賊於遂安開化馬金等處湖州旣克追賊至鉛山縣坊湖鎮等處前後數十戰常爲諸軍選鋒其在孔靈大隊未至以一營奮力衝擊賊眾大潰追入村中搜剿又踏毀村外壘卡甫克績溪卽星夜馳援祁門兩旬之內連克二城斃賊千計其在餘杭會合楚軍二十餘營搭造浮橋圍攻賊壘會全軍失利賊目汪海洋等乘勝追蹙直撲浮橋該總兵力扼橋北開礮擊斃僞王一名賊始引退是役保全各營救出落水敗卒無算聲名大振汪海洋兇悍劇賊自此畏憚該營其在坊湖與楚軍統將黃少春約期會剿及期震營先至遂以孤軍設伏擊賊斬獲三四百名獲馬百餘匹賊

眾倉皇驚潰及黃軍至而賊已敗退其驍勇善戰皆此類也又嘗單騎入賊壘以察降賊真偽左宗棠嘗以膽識堅定血性過人奏保又以其好學知書奏改文職奉

上諭左宗棠奏副將馬復震因祖父先後殉難立志復仇隨同征戰多年志趣卓然懇請酌改文職等語著該部查明具奏等因欽此旋格於部議保加總兵浙省肅清又隨左宗棠由閩入陝會剿擒逆營杖文案之犯軍令者一人初入軍營卽誓死滅賊擒平之後年過三十聘妻已故始假歸續聘事母至孝友愛諸弟其馭軍尙威嚴號令整肅常自節薪水以賞敢死之士生平勇於任事懦於取名臨陣則在人先論功則在人後治軍垂二十年年未四十齋志以歿臚陳前後事蹟稟懇奏

卹等情前來臣查馬復震安徽桐城縣人生長儒家其曾祖進士

馬宗漣著左氏傳補注阮元刊入

皇朝經解其祖工部主事馬瑞辰與胡培壺郝懿行等切磋漢學著毛詩傳箋通釋粵逆之亂罵賊殉節其父孝廉方正馬三俊起義師陣亡左宗棠刻其遺集馬復震由世襲雲騎尉起家曾國藩初見其詩稱其沈雄似杜甫以其忠勇奮發檄令募兵臣初帶兵皖北不稱淮勇淮勇之名自該總兵始臣在湖廣總督任內委令管帶操江輪船該總兵擊寇西國水師兵法講求鎗礮測量沙綫博搜冥討具有內心同治十年經臣調巡北洋曾國藩仍令往來南北迨南洋船多始專歸北洋之用臣於奏調輪船摺內曾稱該總兵沈毅有爲又與江南督臣會奏稱其號令嚴明研求洋務堪勝海疆專閫之任近年奉

旨籌辦海防該總兵隨同整頓方資臂助遽以久歷洋面侵襲風



濤積勞成疾歿於營次深堪憫惻伏念淮軍之興及海上兵船該  
總兵皆爲發軔之始似宜見於紀載其文武兼備義烈忠亮尤爲  
海防不可多得之材合無仰懇

天恩俯准敕部將新授陽江鎮總兵馬復從優議卹並

宣付史館立傳以慰忠魂所有總兵病故請卹緣由理合恭摺具  
奏伏乞

皇太后

皇上聖鑒訓示謹

奏

查明霸州營田摺

光緒三年六月十九日

奏爲查明霸州營田並非

西陵公產應仍照案歸地方官經理恭摺仰祈

聖鑒事竊臣前准部咨光緒二年十二月十七日內閣奉

上諭載鋼榮頤奏請飭交

陵稻營田一摺據稱順天霸州舊有

陵稻營田五十七頃九十餘畝久被水衝沙壓現在已無水患堪

以耕種請飭該知州如數交出等語著李鴻章萬青藜張澐卿詳

細查勘奏明辦理欽此遵經行司遴委候補知縣董汝緘前往會

同府尹臣委員署南路同知汪家勳詳細勘查稟山藩司孫觀核

議具詳前來臣查霸州東南鄉臺山等七村原有稻田五十七頃

六十七畝三分三釐係雍正十一年營田觀察副使光祿寺卿王

鈞置買民地營成又續墾地二十五畝八分內改種雜糧地一頃九十六畝六分七釐園外旱地五頃八十五畝三分三釐窪下葦地三頃七十九畝荒地二頃四十九畝實計稻田四十三頃八十三畝一分三釐先由直隸督臣奏派專員經管仍令該州相助爲理召募附近居民佃種按官四佃六分收將稻穀碾米歲解易州倉糙粳米二百五十九石一斗以備

西陵員弁俸糈之用餘米及雜糧一併變價扣歸粃米工價及運解易州水陸腳價並有應完園外旱地正耗錢糧閏年銀九兩四分八釐正年銀八兩九錢八分六釐再有盈餘儘數批解藩庫添補運池書院士子膏火及省城普濟堂貧民口糧其葦地分收草草係變價解交清河道庫以充工需如遇災歉不敷解運易州倉米俟下年豐收補解嗣於道光十一年奉

上諭營田成規早定與其每屆三年遴員奏派莫若仍歸州縣自行經營杜僥倖而有責成歸簡易而息紛更等因欽此卽經前督臣琦善欽遵奏明自道光十二年爲始歸該州自行經營一切章程悉仍其舊歷今循辦從無異議此霸州營田本係民地先由督臣派員經營繼歸該州自行經營之原委也

西陵守護大臣載綱等原奏以此項營田久被水衝沙壓不堪耕種今據該州民人劉玉喜呈明現無水患又臣接准該大臣等函稱據佃戶趙連璧王得明牛喆楊殿臣等赴

陵具呈謂該州捏災苛斂勒令佃戶於委員處遞稟歸州經理屬臣核辦等因經臣疊次嚴飭該委員等據實確查旋據稟稱劉玉喜係無業游民因知營田堪種冒認該州臺山村故民劉本瀛後裔謀充莊頭希圖奪佃漁利該州承種營田之七村佃戶張振才

等二百餘人已聯名呈請究辦劉玉喜畏罪潛逃所稱赴

陵遞呈之趙連璧等四人內牛詰一名並未赴

陵具呈係趙連璧等捏名列入王得明楊殿臣亦俱逃避傳到趙連璧供被劉玉喜愚弄捏詞遞呈該委員等細加查訊該州並無捏災苛斂情事其七村佃戶係在該委員處面遞呈詞因劉玉喜意在奪佃求免變亂舊章仍歸該州經理情詞切實非該州所能抑勒至此項營田從前分收稻穀本係碾米按年運解易州嗣因河淤隄塌水患頻仍往往失收未能運解近經臣派員籌款挑濬中亭河堅築長隄上年隄工告竣水患始息以後可種早糧冀有收穫此又劉玉喜等營私捏呈及營田前被水患現已涸復之情形也查該大臣等原奏有數十年來豈俱水旱歉收並未供應陵稻之語不知此米照章應解易州不應徑解

陵部此數十年中解易州者亦不少矣益

西陵員弁兵丁應食米石截撥南漕東漕皆歸易州兌收存倉查照部定應給米數由易州於倉存項下按季放給在

陵部惟向易州取米並非自司倉儲是以營田之米亦運易州兌收存倉彙入漕糧支放奏銷從前供應俸糈之內卽有營田之米該大臣等未悉情形故謂數十年未供應耳又該大臣等給臣面內有此項營田係專歸廣恩庫項下月供

陵糈之語臣飭藩司細查並無此項案據惟營田本係民地歸地方官自行經營將分收之米按額解易州存倉彙入漕糧支放奏銷則固彰彰可考事無兩是案豈能歧其爲並非

西陵公產更不專歸廣恩庫項下月供

陵糈固無疑義所有此項營田五十七頃九十餘畝臣與府尹臣

往復商應恪遵道光十一年欽奉

諭旨仍歸該州自行經營以專責成而息紛更其捏控之劉玉喜等應飭拏獲照例究辦至營田向藉開座涵洞以資蓄洩種稻近因河勢變遷非厚築長隄堵塞開洞不能抵禦盛漲保衛隄內數州縣農田是以權衡輕重就隄堵塞此後改種旱糧自不能運解稻米查

陵部兵糈本須粟米應自光緒三年起即令霸州於分收雜糧內以粟米抵解惟粟米究不如稻米應照原額加增四十石九斗每年以三百石解交易州存倉與截收漕糧備供

陵部兵米仍由易州彙冊奏銷下餘米糧照案核實變價除開支運米腳價應完錢糧外儘數報解司庫撥用原有葦地分收之項仍變價解交清河道以充工需其運解易州粟米每年限以十月

爲期不准延欠亦不得列入交代折價若被水旱災歉在五分以下者應仍照現定額數解交卽有不敷責令該州連連腳一併賠補以杜捏災侵蝕等弊備水旱全災果係顆粒無收委勘確實方准將易米免解仍俟下年豐收補還似此分別整頓並飭藩司隨時查覈嚴催如該州敢有藉詞延欠虧挪情事卽行詳參勿貸所有遵

旨查明辦理緣由理合會同兼管順天府府尹臣萬青藜順天府府尹臣張雲卿恭摺陳伏乞

皇太后

皇上聖鑒謹

奏



淮軍軍需報銷摺

光緒三年六月十九日

奏爲淮勇軍需自同治十三年七月起至光緒元年十二月底止收支款目造冊報銷恭摺仰祈

聖鑒事竊照淮勇軍需前截至同治十三年六月底止業經列爲第三案報銷於光緒二年五月十四日具

奏奉

旨該部知道單併發欽此伏查淮軍分防直隸保定及天津海口護衛親軍盛仁馬步水師並各營局護運糧餉軍械營哨共計三十三營提督劉盛休接統臬司劉盛藻原部銘軍馬步十七營由陝西調紮山東濟甯州爲南北洋海防策應之師又前次

奏調提督唐定奎統領銘武步隊十三營前往臺灣防勦於元年七月凱撤仍回江蘇與原辦江防之提督吳長慶統帶所部慶字

親兵八營提督劉玉龍開花礮隊一營及調防吳淞海口之提督  
吳宏洛武毅右軍步隊五營徐宿馬隊五營統歸淮勇軍需案內  
彙冊請銷今自同治十三年七月起一律截至光緒元年十二月  
底止列爲第四案俾清界限以上營哨官弁員名勇夫總數征防  
處所先經造冊分咨軍機處戶兵二部備查至陸軍各營所支薪  
費口糧正雜各款內柴薪一項已遵照

奏明支給本色其駝騾喂養卽按點驗實存數目每隻頭日支銀  
一錢餘循前案仍照楚軍刊本營制並奏定章程准銷成案接續  
造報又馬隊倒補馬匹係照駐紮省分營驛例價分別核給水陸  
轉運雇用車船夫役價腳按照餉械軍火斤重程途里數悉照軍  
需例案及歷屆准銷數目核實支發飭將截至光緒元年底止收  
支細數分晰造報今據金陵報銷局司道等詳稱舊管項下上屆

截至同治十三年六月底止實存銀四十七萬五千一百四十八兩二錢有奇新收項下總計浙江四川兩省協餉並臣沈葆楨在臺防撥濟提督唐定奎行營餉精又先後提撥湖北江蘇藩關釐局軍餉兩淮鹽釐及西征初案報銷內刪減知州梁承祖繳回溢領薪水同本案扣存平餘等項共銀五百七十二萬八千六百四十二兩六錢有奇以上管收二項共銀六百二十萬三千七百九十兩九錢有奇內登除提督唐定奎原部十三營臺灣凱撤由滬雇用招商局輪船裝送至瓜洲價腳及天津海防工程用款共銀三十九萬六千六百一十八兩五錢有奇又附列專冊請銷補放淮軍各營同治十三年六月底以前欠餉銀二十五萬一千九百一十六兩二錢有奇又本案附請專案

奏銷洋鎗礮隊教習辛工並金陵天津行營機器製造兩局工料

用款購買外洋軍火價值等項兩冊共銀三十萬八百八十五兩  
有奇實計收用銀五百二十五萬四千三百七十一兩有奇開除  
正雜各款遵照部議酌定軍需報銷章程各歸各部核銷計應歸  
戶部核銷銀四百三十萬七千一百一十九兩二錢有奇應歸兵  
部核銷銀七萬六千九百三十三兩四錢有奇應歸工部核銷銀  
一十三萬六千八百兩七錢有奇統共請銷銀四百五十二萬八  
百五十三兩四錢有奇實存銀七十三萬三千五百一十七兩六  
錢有奇已接支光緒二年正月起淮軍馬步水師各營正雜餉項  
並購製外洋鎗礮軍火器械價值工料等用歸於後案舊管項下  
滾接造報等情具詳請

奏前來臣查淮軍分調直東江蘇等省沿江海口擇要駐防此次  
造報馬步水師各營勇丁遵照部咨開報花名清冊正雜款項概

發湘平折實庫平報銷仍扣雜款一分平餘均係循照歷辦成案  
實用實銷並無絲毫浮冒除將細冊分咨各部並飭將以後用款  
趕緊接續清理造報外所有同治十三年七月起截至光緒元年  
十二月底止淮勇軍需收支款目造冊報銷緣由謹會同南洋通  
商大臣兩江督臣沈葆楨專摺具

奏並繕清單恭呈

御覽伏乞

皇太后

皇上聖鑒謹

奏

謹將同治十三年七月起截至光緒元年十二月底止淮勇  
軍需案內收支正雜各款繕具清單恭呈

御覽

計開

舊管

一上屆淮軍第三案軍需截至同治十三年六月底止實存銀四  
十七萬五千一百四十八兩二錢六分二毫八微七纖

新收

一收浙江省協餉共撥解銀九萬兩

一收四川省協餉共撥解銀一十七萬兩

一收辦理臺防軍務船政大臣沈葆楨撥濟調臺助防淮軍統領  
提督唐定奎所部十三營餉銀一十萬五千六百四十七兩二錢

二分三釐七毫五絲二忽

一收湖北軍需局共提撥沙平銀二十一萬兩共合湘平銀二十萬九千八百五十三兩

一收湖北江漢關共提撥四成洋稅庫平銀四十萬兩共合湘平銀四十一萬三千七百六十兩

一收湖北江漢關共提撥六成洋稅關平銀六十萬兩共合湘平銀六十一萬八十兩

一收蘇州藩司庫共提撥銀三十八萬兩

一收江南海關共提撥銀九十五萬兩

一收江蘇捐釐總局共提撥釐捐銀一百六十七萬二千三百七十七兩一錢三分五釐三毫九絲五忽

一收鄂岸鹽釐共提撥銀三十萬六千五百四十四兩七釐四毫四絲

七忽七微五纖

一收湘岸鹽釐共提撥銀一十萬二千一百兩

一收西岸鹽釐共提撥銀七十四萬五百五十三兩八錢八分一

釐

一收皖岸鹽釐共提撥銀一萬九千七百四十三兩八錢二分

一收淮軍西征軍需初案報銷內經戶部刪減前辦武毅軍營務

處知州梁承祖繳回溢領薪水湘平銀二十一兩五錢

一收木案轉運價腳采辦製造等項共扣存平餘銀一千六百六

十七兩二錢四分六釐九毫七絲五忽六纖

以上管收二項共庫平銀五百一萬三千二百九十一兩五

錢七分四釐七毫七絲六微八纖

湘平銀一百二十三萬三千七百一十四兩五錢折合庫平



銀一百一十九萬四百九十九兩三錢七分二釐七毫六絲

八忽

共計庫平銀六百二十萬三千七百九十兩九錢四分七釐五毫三絲八忽六微八纖

登除項下

一撥放天津海防應用洋鎗礮火子彈等項購買價值撥歸直隸省海防支應局入收造銷銀三十八萬八千五百九兩六錢五分二釐二毫三忽

一撥放天津工程用款撥歸直隸省海防支應局入收造銷銀五千四百八十三兩五錢三分八釐三毫一絲二忽

一撥放提督唐定奎所部銘武步隊十三營自臺灣凱旋抵滬船用輪船裝送至瓜洲用款由江蘇上海招商局入收彙冊造報銀

二千六百二十五兩四錢三釐八毫

一附列本案專冊請銷補放淮軍各營同治十三年六月底以前欠餉銀二十五萬一千九百一十六兩二錢六釐一毫七絲四忽

一附列本案第一冊請銷淮軍各營洋鎗礮隊教習通事人等辛工等項銀七萬八千二百五十九兩二錢六分二釐七毫六絲二忽

一附列本案第二冊請銷金陵天津行營機器製造各局委員薪糧工匠工食料物並購買外洋軍火價值等項銀二十二萬二千六百二十五兩八錢四釐四毫三絲三忽

以上登除並附列請銷各款共庫平銀九十四萬九千四百一十九兩八錢六分七釐六毫八絲四忽

實計收用庫平銀五百二十五萬四千三百七十一兩七分

九釐八毫五絲四忽六微八纖

開除

一第一冊請銷淮軍駐防直隸省天津馬步各營統領營哨官弁勇夫薪糧等項內歸戶部核銷薪費口糧馬乾等銀一百六十四萬二千六百八十三兩四分八釐四毫八忽兵部核銷倒補馬價銀二千五百七十九兩三錢六分八釐九毫九忽

一第二冊請銷淮軍駐紮山東省濟甯州馬步各營統領營哨官弁勇夫薪糧等項內歸戶部核銷薪費口糧馬乾等銀八十萬二千三百一十四兩八錢二分七釐七毫五絲三忽兵部核銷倒補馬價銀四千一百二十二兩三錢五分八釐三毫九絲

一第三冊請銷淮軍調赴臺灣凱旋仍回江蘇省步隊各營統領營哨官弁勇夫薪費口糧等項係歸戶部核銷銀六十七萬二千

五百一十八兩五分四釐六毫一絲七忽

一第四冊請銷淮軍駐防江蘇省馬步各營統領營哨官弁勇夫薪糧等項內歸戶部核銷薪費口糧馬乾等項銀八十七萬二千五兩二錢一分二釐七毫三絲五忽兵部核銷倒補馬價銀九千六百五十一兩六錢四分五釐二毫七絲六忽

一第五冊請銷督標水師各營哨官弁勇丁薪費口糧等項係歸戶部核銷銀一十一萬五百六十二兩九錢六分三釐二毫六絲六忽

一第六冊請銷隨營辦事支應各差京外文職官員薪糧等項係歸戶部核銷銀二萬七千四百七十八兩五錢二分九釐三毫八絲三忽

一第七冊請銷隨營先鋒差遣武職官弁薪糧等項係歸戶部核

銷銀二萬六千三百五十二兩九錢八分六釐五毫八絲七忽

一第八冊請銷淮軍馬步各營柴薪斤重價值係歸戶部核銷銀

一十一萬二千六百六十兩七錢八分九釐三毫四絲七忽

一第九冊請銷淮軍馬步各營駝騾購車喂養車輛雇價等項內  
歸戶部核銷駝騾購車喂養銀四萬二千三百四十一兩七錢九  
分二釐九毫一絲七忽兵部核銷車輛雇價銀二萬二千五百八  
十兩三錢三分三釐八毫八絲

一第十冊請銷淮軍各營哨弁勇夫亡故卹賞受傷養傷等項係  
歸兵部核銷銀六千七百五十七兩六錢九分五釐六毫四絲八  
忽

一第十一冊請銷各臺局所水陸轉運餉械車價水腳夫役工食  
等項係歸兵部核銷銀三萬一千二百四十二兩九分三釐六毫

九絲九忽

一第十二冊請銷采辦物料製造軍裝器械工價並油艚船隻經費等項係歸工部核銷銀一十三萬六千八百兩七錢五分四釐九毫二絲一忽

以上第一冊至第十二冊止共歸戶部核銷銀四百三十萬七千一百一十九兩二錢五釐一毫一絲三忽兵部核銷銀七萬六千九百三十三兩四錢九分五釐八毫二忽工部核銷銀一十三萬六千八百兩七錢五分四釐九毫二絲一忽統計十二冊共請銷銀四百五十二萬八百五十三兩四錢五分五釐八毫三絲六忽

實在

存銀七十三萬三千五百一十七兩六錢二分四釐一絲八忽六

微八纖

查前項實存已接支光緒二年正月起淮軍馬步水師各營正雜款並購製洋軍火器械價值工料等用歸於後案舊管滾接分晰造報理合登明

一同治十三年七月起截至光緒元年十二月底止共欠發淮軍陸勇水師各營餉銀二十六萬四千八百六十五兩五錢六分三釐七毫四絲一忽一微

查前項欠發續有補給戶歸後案專冊開報理合登明

軍需交涉洋務報銷片

光緒三年六月十九日

再查淮軍各營洋鎗礮隊教習通事工匠人等辛工行營機器製造局工料及購買外洋軍火等項前截至同治十三年六月底止業經附

奏准銷並聲明金陵機器製造局自同治十二年六月起用款俟開報至日核明彙歸次案造報在案今自同治十三年七月起淮軍各營洋鎗礮隊教習通事工匠人等辛工等銀七萬八千二百五十九兩二錢有奇天津行營機器製造局委員薪糧工料用款等銀八萬二千四百五十九兩有奇購買外洋礮位軍火等價銀二萬三千七百九十兩一錢有奇均截至光緒元年十二月底止又金陵機器製造局自同治十二年六月起至光緒元年十月底交接止委員薪糧工料用款等銀一十一萬六千三百七十六兩



五錢有奇以上總共請銷銀三十萬八百八十餘兩茲據該司道等按款復加查核均係奉文核實飭發並無絲毫浮圖戶造細冊詳請附

奏前來臣查前項各營洋鎗礮隊教習通事工匠人等辛工購料物外洋軍火價值各款皆與洋人交涉無例可循仍應照案據實請銷除將細冊咨送總理衙門戶兵工部查核外伏乞

聖鑒謹附片具

奏

議升祔典禮摺

光緒三年七月初一日

奏爲遵

旨覆議

升祔典禮恭摺仰祈

聖鑒事竊臣承准軍機大臣字寄六月十四日欽奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨本日據禮親王世鐸等奏  
遵議穆宗毅皇帝孝哲毅皇后神牌升祔位次一摺又據醇親王  
奕訢詹事府少詹事文治鴻臚寺卿徐樹銘內閣侍讀學士鍾佩  
賢鴻臚寺少卿文碩國子監司業寶廷月行陳奏各摺片已明降  
諭旨令惇親王奕諒恭親王奕訢醇親王奕譞御前大臣軍機大  
臣大學士侍郎等同龢夏同善禮部太常寺將王大臣等所奏各

摺片詳細閱看再行安議具奏矣

廟制關係鉅典必須考覈精詳方足以昭慎重著再派李鴻章悉心妥議具奏禮親王世鐸等摺一件醇親王奕譞等摺片九件並侍郎袁保恆等說帖五件均著鈔給閱看將此諭令知之欽此仰

見

皇太后慎重鉅典聿求厥中之至意臣查禮親王等議增龜座志在斟酌時宜諸臣請改廟制志在考求古禮要皆出於尊崇祖宗之忱未易折衷定論以臣所聞禮文殘闕古制難詳七廟九廟之文漢世已無定說都宮別殿與同堂異室昔人亦互有是非即朱子宗廟圖議馬端臨邱濬等皆病其過拘臣考周官匠人營國世室明堂皆止五室鄭注五室並在一堂據此則朱子所圖世室親廟以次而南似亦未必盡合古制至於特建

寢殿增修方殿等說更爲古制所無禮親王等奏稱侍講張佩綸請建世室事涉更張應毋庸議等因

宗廟事重未便輕議改作該親王等所奏不爲無見我

朝

廟制定於

國初

祖宗神靈協會一室已二百餘年一旦遷改

神明必有不妥

太廟重垣周二百九十一丈殿陛庭墀各有定式皆一成而不可變今欲就增數室位置必難得宜又

升祔吉期理不宜誤戴記所稱不忍一日未有所歸者也準古酌今改廟實有難行禮緣人情可以義起因時立制自以仿照

奉先殿成案增修龕座爲宜議者或以簡略爲嫌臣考古禮祔廟迭遷亦止改塗易檐並不大更舊廟今之龕座略如晉宋以來之坎室晉太常華恆建議廟室以容主爲限無拘常數厥後王導溫嶠等往復商榷議增坎室宋增八室蔡襄爲圖此皆違禮君子度時之宜以成一代之典彼豈未聞世室親廟之說亦謂禮樂不相沿襲事異殷周禮從而變也今之增龕實其比例或又謂

奉先殿乃古原廟之制與

太廟事體不同查會典所載雍正十一年奏准

奉先殿

神牌供奉與

太廟理應畫一是

太廟如

奉先殿制久有成憲可循不得謂  
奉先殿可以增龕獨不可仿行於

太廟也仰維

列聖家法皆

躬行節儉以先天下今日援案增龕之議事屬楮宜意從儉樸未  
必不當於

列聖降鑒之心廷議既已允諧似應無煩疑慮至祧遷之禮雖古  
之常制而藏主之室則禮無明文鄭康成禮經大師其言周制祧  
主藏於太廟及文武世室是已祧之主與不遷之祖同處一廟故  
廟亦名祧晉代之制藏於西儲夾室當時已疑其非禮後世竟沿  
爲故事儒家每謂祧於夾室爲古制殆臆度之辭廟旣與古不同  
祧亦未宜輕議惟

太廟規制有定

國家統緒無窮醇親王議請

明降諭旨曉示天下自今以往親盡則祧並請以

後殿東西二梢間永藏祧主此則導

皇上以大讓酌

廟制以從宜禮貴因時讓爲美德非天子不議禮應否

允行自應一秉

聖裁非臣下所敢妄擬矣所有

微臣遵

旨敬謹詳議緣由是否有當恭摺由驛覆陳伏乞

皇太后

皇上聖鑒訓示謹

奏

開采科爾沁鉛礦片

光緒三年七月十四日

再臣前訪聞張家口外諸山礦產甚富當飭升用知縣周世澂前往會同署張家口理事同知成錦確切查勘酌取礦砂送呈分鍊茲據該員等稟稱張理廳所屬地面下科爾沁南地上四牌樓溝一帶山多產鉛礦苗暢旺去民間村窯廬墓甚遠開采毫無窒礙並據世襲輕車都尉勅舊佐領吉勒罕保呈稱科爾沁地方爲國初時伊祖承受游牧馬廠取原籍科爾沁爲名嗣因兵食不敷將所屬村地招民開墾在張理廳升科納糧其父德禧查明山有礦產卽擬報采濟軍今聞查勘礦務願將該山坐落界段指明報捐以繼父志不敢仰邀議敘等情由該員等轉稟前來臣查津滬機器各局製造鎗礮子彈及各項軍器所需物料以青白鉛爲大宗中國礦產未開歷皆購自西洋價值運費咸糜鉅款一有缺乏



奏稿 卷二十九  
往往擡價居奇費至數倍至如民間器用需鉛亦多今張家口外  
科爾沁山自有鉛礦既稱鉛苗暢旺無礙民居該員等采取礦石  
呈驗經臣招工到署面試分鍊鉛質之佳不減外洋鉛內閒含銀  
質可用化學分提亟應設法開采以盡地利而濟軍需擬先由各  
局采購鉛價內勻撥銀五千兩以爲工本派委周世徵等會商成  
錦安爲試辦卽雇用本地居民以爲礦丁務令輿情悅服所采鉛  
銀陸續繳局歸公濟用其應否酌購機器及如何激勸地主之處  
一俟開采有效再行妥定章程奏明辦理所有委員試辦鉛礦緣  
由理合附片具陳伏乞

聖鑒謹

奏

借撥晉賑捐

光緒三年八月初八日

奏為遵

旨酌量借撥晉省賑款恭摺陳仰祈

聖鑒事竊臣欽奉光緒三年七月初四日

寄諭洗馬溫忠翰奏山西各府州縣連年亢旱賑恤飢民需款甚鉅前經曾國荃奏准截留京餉二十萬兩誠恐不敷分撥除本省勸捐助賑外不得不預籌協濟查江浙釐金現撥南北洋海防經費請將此項借撥銀一二十萬兩以應急需俟晉省捐款集有成數再行撥還等語晉省被災較重疊據該撫奏報情形賑撫勢難稍緩溫忠翰所奏請撥海防經費接濟目前自係為移緩就急起見即著李鴻章酌量借撥咨照曾國荃派員領解回晉核實散放俟山西庫款稍裕即行撥還等因欽此伏查江浙釐金項下奉撥

海防經費兩年以來江蘇分釐未解浙江亦未按額解足統計庫  
存無多且此係海防專餉總理衙門與戶部原奏未可挪作他用  
是以上年直境旱荒賑款不敷僅就司道各庫竭力羅掘未敢絲  
毫借動現須訂購外洋船礮子彈水雷等項約計購價頗巨若一  
借撥深恐有誤急需勢難兼顧惟晉省旱災較重賑撫用繁截留  
京餉既慮不敷捐款尙未能速集

諭旨飭臣酌量借撥敢不設法籌以顧大局當與曾國荃往復  
咨商議定借撥銀十萬兩卽由晉委員來領查天津有解存練餉  
制錢一款前經奏明發交江浙典商分領生息原議如有需用隨  
時檄提正可移緩就急臣已飭令江浙兩省典商各提原領制錢  
七萬五千串共合十五萬串剋期解津卽照時價核實易銀十萬  
兩以爲借撥晉省賑款如易銀尙不足數卽於練餉項下提補惟

該典商備錢解津有需時日先飭司道設法暫行挪墊以便委員迅速領回應用仍俟晉省庫款稍裕照數撥還練餉原款如此一轉移閒鄰疆賑需藉資接濟而海防購辦各項亦不至停待似屬兩有裨益除俟易銀竣事即將動用錢數咨部存案外所有酌量借撥晉省賑款緣由理合恭摺由驛覆陳伏乞

皇太后

皇上聖鑒訓示謹

奏

籌辦平糶片

光緒三年八月初八日

再直境四月以後天氣亢旱田禾間已乾枯並有蝗蝻萌生處所至六月下旬始皆得雨惟未能普律深透七月間雖續得甘雨數次而多寡不等或此有彼無其未霑足者晚苗既難滋長早禾亦未盡成實節逾白露秋收大致已定保定正定河間各屬每有得雨稀少之處災歉已成此外亦間有歉薄俟勘定後尙須酌籌撫恤現在糧價昂貴小民糴食維艱必應先籌接濟向來直境歉收多販運奉天雜糧今年該省秋收尙稔臣已商飭津省司道設法籌湊款項派委委員由臣給照赴奉天購粟糶糴糧卽由海道回津轉運平糶並酌量留備賑需仍招徠遠近商販一體購運若得源源而來市價自能平減民食藉資轉輸事關荒政仰懇天恩俯准照案免徵沿途關卡釐稅並

敕下該省將軍府尹示諭各口文武員弁一體驗照放行勿任吏役留難糧戶居奇庶於畿疆民食有裨除飭屬查勘災區分別輕重籌議奏辦外所有采購奉糧平糶請免沿途釐稅緣由理合附片具陳伏乞  
聖鑒訓示謹  
奏

奏保丁壽昌片

光緒三年八月初八日

再布政使銜遇缺題奏按察使丁壽昌自本年二月奉

旨飭調來津經臣委令總理營務處並充海防翼長旋因崇厚銘

安奏調赴吉又經臣以

畿輔重地得人爲亟奏准留津數月以來遇事商籌深資忠益臣查丁壽昌識量深閎才力沈毅兵事吏事具有兼長其辦事講求實際心精力果實足以振起疲沓肩任艱鉅爲

國家拔急足恃之材該員前由遇缺題奏按察使借補天津道缺查同治八年十二月部議新章奏奉

上諭已保藩臬題奏者均准先補道員由該督撫察看如果實能稱職出具考語奏請升用至賢能素著之員仍著直省督撫隨時保奏等因欽此丁壽昌前任津道五年深已愛民賑饑救患輿情

愛戴不惟當官稱職實屬賢能素著之員臣去年六月曾奏其才堪大用日前津郡軍民靜謐若久置閒散權位不足自展人才亦覺可惜該員本係題奏按察使經臣察看已久吏治練習允堪勝任合無仰懇

天恩遇有臬司缺出准以丁壽昌簡放庶該員無躐等倖進之嫌而地方亦藉收得人之效臣爲賢員未可久淹謹附片具陳伏乞

皇太后

皇上聖鑒謹

奏



籌撥晉豫賑款摺

光緒三年八月二十三日

奏為遵

旨籌撥晉豫賑款恭摺陳仰祈

聖鑒事竊臣欽奉光緒三年八月二十一日

寄諭夏同善奏晉豫二省被災最重請旨加撥賑帑並飭李鴻章  
采買米糧接濟晉省各摺片本年山西河南亢旱成災而山西為  
尤甚飢民嗷嗷待哺道殣相望披覽所奏情形實深矜憫前經降  
旨准該二省截留京餉備賑復准晉省開捐惟被災既廣聚之為  
巨款散之即屬畸零開捐集資亦恐緩不濟事該侍郎請於部存  
關稅項下撥銀四十萬兩天津海防經費項下撥銀三十萬兩以  
七成給晉三成給豫著戶部李鴻章迅速籌議具奏再降諭旨等  
因欽此仰見我

皇太后

皇上軫念災區

恩施稠疊欽感同深伏維晉豫二省上年本已歉收今歲又皆亢旱晉省災重且廣飢民嗷嗷待哺道殣相望情形誠有如夏同普及各撫臣所陳者臣近接鄰疆屢有所聞莫名焦慮而直隸被旱地面亦復不少正須酌籌賑撫連年災歉公私交窘極費經營實已自顧不暇前奉

諭旨借撥晉省賑款業於天津練餉制錢項下籌撥銀十萬兩奏蒙

俞允當飭司道設法挪墊於八月初一日發交該省委員如數領回在案其時海防經費擬訂購外洋軍火一經購成卽須付價勢難先作他用臨時無以應急失信洋人今幸上年原訂美國黎氏

魚水雷該洋人先行運到一具因其價值太貴設法退回尙可勻出經費暫撥賑款曾國荃李慶翱及侍郎袁保恆等亦均來函告急臣維賑濟災黎非他用可比擬請卽於天津海防經費項下撥銀二十萬兩以七成給晉合十四萬兩三成給豫合六萬兩連前撥晉省練餉銀十萬兩已足三十萬兩之數如蒙

特恩撥給則前撥十萬兩似可毋庸籌還所有此次給豫之款應由該省委員領解給晉之款卽作爲購運賑糧之需以上副朝廷子惠元元至意理合恭摺由驛覆陳伏乞

皇太后

皇上聖鑒訓示謹

奏

籌辦晉賑片

光緒三年八月二十三日

再夏同善原片內稱山西購糧不易請將所撥海防項下賑濟銀兩由臣采運米糧等語奉

上諭應如何籌辦及由何路轉運飭臣一併速議奏明辦理等因欽此伏查救荒之策首在籌糧而購運事宜尤須熟計直隸亦被旱災民食缺乏前經奏明籌款派員赴奉天采購雜糧由海運津以資本省糶賑並因晉省災重糧少價昂飭據津海關道黎兆棠輪船局道員朱其昂由津招商備糧二千石因直境各河皆涸船運交河縣泊頭鎮換車至獲鹿縣改爲騾馱赴山西榆次縣平糶先爲試辦惟運道過遠舟車數易自獲鹿入晉山路萬分崎嶇行程既遲運費尤巨此時奉天陳糧將盡新糧尙未登場本屆封河較早恐難多購多運晉省災區甚廣爲日方長冬賑固須急籌春

撫亦須接濟儻難一起購運尙可陸續籌辦前准曾國荃咨請派員在津捐賑經臣檄委遇缺題奏臬司丁壽昌與黎兆棠等廣勸各商量力捐助昨已據道員胡光墉稟報捐助山西賑銀一萬五千兩丁壽昌黎兆棠素顧大局皆以晉中災困爲急所有此次奉撥賑銀購運晉糧各事宜應令該司道體察情形趕速籌議妥便之法由臣隨時咨商曾國荃設法迎提總期多運一石之糧俾晉民多得一日之食理合附片覆陳伏乞

聖鑒謹

奏

海防經費免再抽撥片

光緒三年八月二十三日

再海防經費一款總理衙門與戶部原奏未可挪作他用原以海防關繫重要經費籌畫艱難合之則可逐漸經營分之則斷不能集事恭查議辦海防之始

穆宗毅皇帝有亟應實力講求同心籌辦堅苦貞定歷久不懈以紓目前當務之急以裕國家久遠之圖之

諭光緒元年四月間定議我

皇上又有若僅空言了事因循廢弛何時見諸施行亟宜未雨綢繆以爲自強之

諭臣自奉

命督辦以來深懼智慮短淺致誤事機尤恐款不應手終成畫餅一切出納必慎之又慎既不敢稍涉鋪張糜費亦未嘗以他用挪

動絲毫然奉撥餉每歲號稱四百萬兩三年以來實解不過二百萬是每年僅得數十萬兩固已有名無實各省釐金或分毫未解或解不及半各海關四成洋稅開銷本多又撥去半分歸還西征軍餉原借洋款臣深知各省入不敷出未便過事催迫而餉無所措防務迄無就緒焦灼莫名原議先就北洋創設水師一軍必須購置船礮等項其鐵甲船一項實爲軍中利用不可或少疊經商屬出使大臣及出洋各員訪察船式價目現在丁日昌又議請及時購辦若一經購成每隻價需百萬內外此外又有已經訂定之英國馬梯呢後門兵鎗德國克鹿卜後門鋼礮及赫德續購船礮藥彈統計需價亦巨貨到必應付銀現在積存經費僅止一百數十萬兩近又奉部議分半解閩以後各省關續解必更無幾以來源待盡之款而辦此重大軍需如湯沃雪奚從措手茲原訂美

國水雷因價太貴設法退回藉稍勻撥晉豫急需以仰體  
朝廷軫念災區至意惟是海防爲軍國大計洋務之變故難言無  
事時以爲此項可緩漠然置之迨有事時則已措布不及微臣近

依  
畿輔籌備緩急萬不可少合無仰懇

天恩敕下總理衙門戶部查照嗣後此項經費仍遵原奏專爲海  
防要用免再抽分他撥仍隨時由部切實行催各省關照數劃解  
毋任短缺貽誤斯爲大局之幸理合附片具陳伏乞

聖鑒訓示謹

奏



津關欠解京餉請免解片

光緒三年八月二十七日

再准戶部咨天津關欠解光緒元年分六成洋稅京餉銀六萬兩  
原限本年五月以前補解現尙未報起程奏催趕緊籌解等因當  
經轉行遵照茲據津海關道黎兆棠詳稱該關歷年洋稅收數本  
少今年又值亢旱各河水涸商販不前貨物滯銷稅項更形減色  
而應放海防練軍及調防奉天鎗隊月餉稅務司薪水本關經費  
爲數既巨又皆必不可緩每結均係收不敷支竭蹶情形日甚一  
日又有奉撥

惠陵工程銀九萬兩除竭力籌解三萬兩下短六萬兩尙無從設  
措所有欠解元年京餉六萬兩實難補解請照案奏免等情前來  
臣查該關六成洋稅向係抵充本口海防練軍餉項放款緊要收  
數無多實係入不敷出其勢不能他顧歷屆奉撥京餉均經奏免

戶部亦深知該關無可設法疊次議准免解有案今年晉豫直各省旱荒河道皆涸其貨滯稅絀情形更較往年尤甚現距封河不過兩月收數已屬有限應放秋冬各款繁巨又有本年奉撥惠陵工需未解銀六萬兩勢難緩欠尙未知從何設措委無餘力再補舊欠京餉合無仰懇天恩俯念地方災歉稅收短絀准將該關欠解光緒元年京餉銀六萬兩照案免其補解俾資周轉理合附片具陳伏乞聖鑒訓示謹奏